


SAMU NA YINKI YA ZOLAKA VWANDA MUVUNGI

 . . . Mu banza, mutindu ya mulongi ke zonzaka mingi. Mpe kukondwa ndongosolo, mu—mu banza ti mu ke talana ve mingi mutindu mulongi samu na bantu yankaka. Mpe mu—mu ke tubaka ve ti mu ke mulongi, mu ke kaka mutindu piné ya lusalusu. Kasi mu ke kuwa ti mu ke na Nsangu ya Nzambi, ti na mutindu ya munu (ti mutindu mosi kaka mu fwana talisa Yawu), mu ke meka na kotalisa Yawu na yinza. Mpe kana mu vwandaka ve na Nsangu yina, mu zolaka vwanda muyekudi samu na Nzambi mpe muntu ya luvunu samu na beno. Muntu yina ke tuba diambu mosi mpe ke kwikila yankaka, ya kele luvunu. Beto fwana tuba ntangu nionso kieleka ke katuka na ntima ya beto. Ti ntangu bantu ke tala na zulu ya beto, ata ti bawu kele na kuwisana ve na beto, beto zola kuvwanda muntu ya buzitu mpe bakento: ti beto ke zonza na ntima ya beto, yina ti kele kieleka na kati ya bantima ya beto.

² Mvula me luta, to mvula mosi na ntwala ya mvula me luta, mu zwaka ntangu ya mbote ya kutuba Muklisto. . . to beno lemvočila munu, nsangu ya Nowele, awa na Ramada. Mpe mu ke kwikila ti mu me tubila dilongi yayi, to awa to na Phoenix, na zulu ya: *Samu Na yinki Bethlehem Ya Fioti?* Mpe mu ke kwikila ti ya vwandaka awa, mvula me luta, mu longaka na zulu ya: *Beto Me Mona Mbwetete Ya Yandi Na Este Mpe Me Kwisa Na Kusambila Yandi.*

³ Mpe, beno zaba, beto ke tangaka Biblia, mpe beto ke kukiyufula, “*Samu na yinki?*” Mpe na nkokila yayi mu banzaka, kana beno lenda kanga ntima na munu na mwa ntangu fioti, mpe kusambila na munu, mu ke meka na kupesa beno nsangu ya munu ya Nowele. Nzambi kaka zaba kisika beto ke vwanda Nowele yina ke landa, kana ya kele na Nowele yina ke landa na manima ya yayi. Na yina na mutindu ti yayi lendaka vwanda Nowele beto me vwanda kintwadi, tii kuna beto ke vwanda na mesa yankaka. Mpe Ya ke vwanda ve mosi ya mutindu yayi, kasi ya ke vwanda ntangu beto ke kudya mpe ke kunwa kominyo ya malu-malu na Yandi, na Kimfumu ya Tata na nsuka ya nzila. Mpe na yina, beto zonzila yawu na nkokila yayi mutindu ti yayi vwandaka nsangu ya nsuka ya Nowele beto ke vwanda ntangu nyonso kintwadi, na mudindu ya kieleka.

⁴ Mu zola zonzila na nkokila yayi na zulu ya dilongi mosi ya mumesanu ve, kasi bantangu yankaka beno ke mona Nzambi na kima ya mumesanu ve. Yandi ke salaka bima na mutindu

ya mumesanu ve. Ve na nzila ya mumesanu, ya kele mutindu ya mumesanu ve, bantangu ya mumesanu ve, mambu ya mumesanu ve, Yandi kele ve ya mumesanu. Mpe mu zola yayi. . . Kana Mfumu zola, mu zola kuzonza na zulu ya dilongi yayi: *Samu Na Yinki Ya Zolaka Vwanda Muvwungi*.

⁵ Mpe ntangu yayi kaka na ntwala beto belama na Ndinga, yina mu ke kwikila ti yina kele Nzambi, “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka muntu mpe zingaka na kati-kati ya beto.”

⁶ Mutindu mu tubaka, sabala me luta, to sabala mosi na ntwala na Phoenix, “Ya ke talisa ti ya ke na bima ya ntoto yayi, bantu, ke luta na kivinga yayi ntangu yayi.” Television ke siamisa yawu. Ya kele na kitezo yankaka, meso ya beto ya kimuntu mpe ba-sense ya beto tanu lenda simba yawu ve. Ya kele ve yina ke salaka nionso ya television, ya kele kaka ba-antenne. Beno lenda ve kusala kima na musapi ya beno, beno lenda ve kubula meso ya beno, kasi ya me talisa ti ya kele na bande kukondwa nsuka. Mu lendaka vwanda ya kutelama. . . To bakala mosi na Australie, yina ke vwanda na television awa, ve kaka yina kasi muntu lendaka zonza, kuningisa musapi ya yandi, ke bweta disu ya yandi, to ti ntinta ya lele yina yandi me kulwata, ke talisama awa na zulu ya kibaka; mpe yandi na Afrique, Australie, na yinza ya muvimba. Beno me mona, ya kele na cycle ya bitembo ya dizulu. Mu lunga tendula yawu ve, kasi mu zaba ti ya ke kuna. Mu banza ve ti muntu mosi lenda tendula yawu mbote-mbote. Na yina, television lenda benda yawu na kati mpe kukumisa yawu kieleka na nzila ya bisadilu, ti bawu lendaka talisa yawu na kibaka.

⁷ Ntangu yayi, kima ya mutindu mosi vwandaka awa ntangu Adam vwandaka awa. Television vwandaka awa ntangu—ntangu Elie vwandaka ya kuvwanda na zulu ya Mongo Carmel. Ya vwandaka awa ntangu Martin Luther, ntwenya ya nganga-Nzambi, losaka kominyo na ntoto mpe tubaka, “Ya kele kosher! Mpe ke zinga kaka na lukwikilu.” Ya vwandaka awa na ntangu yina, kasi beto ke na kubakula yawu kaka ntangu yayi. Mpe ya ke mutindu yina, ti na ntwala ya beto na nokila yayi kele Nzambi, Bawanzio, bantu ya kimpeve yina ke monanaka ve na meso ya beto ya kimuntu. Kasi kilumbu mosi ya ke vwanda kieleka kaka mutindu television kele ntangu yayi, mpe kaka mutindu mosi. Ntangu yayi, yawu yina mu ke kwikila Ndinga.

⁸ Yesu tubaka, “Konso muntu yina ke bwela ndinga mosi na Biblia yayi, to kukatula Ndinga mosi na Yawu, ba ke katula ndambu ya yandi na Buku ya Luzingu.”

⁹ Na yina, beto kulumusa bayintu ya beto, ntete beto tanga Yawu. Ya kulutila mfunu! Muntu nyonso yina kele na

ngolo ya nsuni lenda balula dititi, kasi kaka Nzambi lenda monikisa Yawu.

¹⁰ Mpe na bayintu ya beto ya kukulumusa ntangu yayi na putulu kisika beto bakaka, mpe kilumbu mosi ke vutuka, Mu ke kukiyufula... Mpe na ntangu yayi, mutindu beto ke na kupusana na Nowele, kana ya kele na bayina kele awa yina ke kuwa kele ya kulunga ve mpe yina ke zola ti ba bambuka moyo na bawu na kisambu yayi, beno ke zola (kukondwa kutelemisa yintu ya beno) kaka kutelemisa maboko ya beno na Nzambi mpe kutuba, “Bambuka moyo na munu, Mfumu, Nowele yayi”? Nzambi kusakumuna beno.

¹¹ Ya kulutula Santu mpe Tata ya Mazulu ya kufuluka na lemvo, Nzambi ya Ngolo nyonso, Yandi yina vwandaka kubanda mbandukulu, ntete ya vwanda na mbwetete, to atome, to molécule. Nge me sala bima nyonso na nzila ya Yesu Klisto Mwana ya Nge, mpe me pesa beto bima nyonso ya mpamba na Yandi. Beto ke tonda Nge, na nkokila yayi, Mfumu, samu na ntangu yayi ya mbote yina Nge me pesa beto samu na kuvukana beto mosi kintwadi, samu na kuvwandaka ya kukebisa mpe ya kulonguka na Mpeve-Santu. Mpe Mpeve-Santu ke bakaka Bandinga ya Nge mpe ke monisa Yawu na beto, samu ti Yesu tubaka, “Ntangu Yandi Mpeve ya Kieleka ke kwisa, Yandi ke bambuka beno moyo ya bima yayi yina mu tubaka mpe ke lakisa beno bima yina ke kwisa.”

¹² Nzambi, kele na mosi ve na kati ya beto, to ya kele na mosi ve na zulu ya ntoto, yina kele ya kulunga na kumeka na kutendula Ndinga ya Nge, samu ya kele ya kusonika ti, “Ndinga ya Nzambi kele ntendulu ya muntu mosi ve.” Na yina, Mfumu, beto ke sambila ti Mpeve-Santu ke pesa beto na nkokila yayi, na konso mpe muntu nionso, kitini yina beto ke na yawu nsatu yina ke sepelisa ntima ya beto yina ke na nsatu ya kutambula pene-pene ya Nge. Beto kele na ngolo ve, mvindu, ya kukondwa kulunga. Bikati Mwana yina butukaka na Bethlehem, yina zingaka luzingu ya kulutula mbote, mpe vwandaka muntu ya kulunga mosi kaka na zulu ya ntoto, mpe Yandi mosi futaka ntalu ti Yandi lendaka sukula beto bansumuki ya mvindu mpe kunata beto na kimpangi na Tata, pesa na nkokila yayi ti Mpeve-Santu ya Yandi (na nzila ya kulonga ya Ndinga) ke sala yawu samu na beto.

¹³ Mfumu Nzambi, kele na bambevo mingi na yinsi bubu yayi, na kizizi ya bankisi ya kulutula kitoko yina beto me sadilaka ntete ve, mpe bankisi ya kulutula mbote mpe balupitalu. Mpe kasi na kati ya bakusengumuna ya beto nionso, dyaka ya kele na bimbevo mingi kulutula yina yinza me zabaka ntete ve, samu ti ya kele na masumu mingi mpe kukondwa lukwikilu kulutula yina yinza me zabaka ntete ve. Sadisa beto na nkokila yayi, Munganga ya Nene, mpe belusa bambevo yina kele na kati ya beto.

¹⁴ Mpe pesa beto Mpeve, Mpeve ya kieleka ya Nowele. Ntangu bubu yayi . . . ti ntangu mikembo ya mimpani, bayinti ya Nowele ya kusambila, masolo ya luvunu ya muntu na nkumbu ya Tata ya Nowele, mpe ba-lapin ya beto ya Paki, mpe bamvwatu ya luswaswanu yina yinza ya mumbongo me kuzwa na yawu, bika ti yawu vwanda na lweka, Nzambi. Beto kota na Klisto Ndinga, samu beto me lomba yawu na Nkumbu ya Yandi mpe samu na nkembo ya Yandi. Amen.

¹⁵ Kana beno baka na munu ntangulu ya Misoniki ya Santu, ya Santu Luc, kapu ya 2. Beno lenda kuwa munu mbote?

Ya ke na kima mosi ke wakana mbote ve na ba-microphone? Beno lenda kuwa munu mbote kuna na manima? Kana beno lenda, beno telemisa diboko ya beno. Matondo na beno. Kapu ya 2 ya Nsangu ya mbote landila Santu Luc.

Mpe na bilumbu yina, ntinu César Auguste pesaka lutumu, ya kusala lutangusu ya bantu nionso.

(Mpe mpaku yayi ya ntete zabanaka . . . yandi vwandaka mfumu ya kizunga ya Syrie.)

Mpe konso muntu vwandaka kwenda kusonikisa nkumbu na yinsi ya yandi.

Mpe Joseph katukaka na Galilée, na mbanza ya Nazareth, na Judée, . . . mbanza ya David, yina ba ke bokila Bethlehem; (samu yandi vwandaka ya yinzo mpe dikanda ya David:)

Yandi kwendaka sonikisa nkumbu ya yandi kintwadi na Marie yina yandi pesaka nsilulu ya kukwela, Marie vwandaka na kivumu.

Mpe na yina ya vwandaka, ti, na yina yandi vwandaka kuna, bilumbu ya yandi ya kubuta lungaka.

Mpe yandi butaka mwana ya yandi ya ntete ya bakala, mpe zingaka yandi na bilele, mpe lalisaka yandi na kidikilu; samu ti bawu kuzwaka ve kisika ya kulala na yinzo ya banzenza.

Mpe kuna na bizunga ya Betelemi vwandaka na mivungi yina vwandaka lutisa mpimpa na matiti samu na kukeba nkonga ya bibulu ya bawu.

Mpe, tala, wanzio ya Mfumu kwizaka na zulu ya bawu, mpe nkembo ya Mfumu zungaka bawu na nsemo: mpe bawu kumaka na boma mingi.

Mpe na yina wanzio tubaka na bawu, Beno vwanda na boma ve: na yina, tala, mu me natina beno . . . nsangu ya mbote, yina ke yangidika mingi bantu nionso.

Bubu yayi ba me butila beno Mvulusi na kati ya mbanza ya David, yina kele Klisto Mfumu.

Mpe yayi ke vwanda kidimbu samu na beno; Beno ke mona mwana ya fyoti yina ba me zinga bilele, mpe ba me lalisa kuna na kidikilu.

Mpe na mpamukunu ya wandaka...Mpe na mpamukunu kuna...na wanzio nkonga ya bantu mingi...makesa ya mazulu ke na kukumisa Nzambi, mpe ke na kutuba,

Nkembo na Nzambi na mazulu, mpe na zulu ya ntoto ngemba, na bantu ya mbote.

Mpe ntangu bawanzio bikaka bawu, samu na kuvutuka na mazulu, mivungi tubaka mosi na yankaka, Beto kwenda ntangu yayi na Bethlehem, samu na kutala yinki me salama, na mambu yina Mfumu me zabisaka beto.

Mpe na nswalu nionso, bawu kwendaka kutala Marie, mpe Joseph, mpe mwana ya fioti ya kulala na kidikilu ya bibulu.

Mpe ntangu bawu monaka mwana, bawu zabisaka mambu yina wanzio tubilaka bawu samu na mwana.

Mpe bayina nionso kuwaka mambu yina mivunga tubaka yitukaka mingi.

Kasi Marie vwandaka bumba mambu nionso yina na kati ya ntima ya yandi, mpe vwandaka yindula mingi na yawu na kati ya ntima ya yandi.

Mpe mivungi vutukaka, bawu vwandaka kembila mpe vwandaka kumisa Nzambi samu mambu nionso yina bawu kuwaka mpe monaka, ya vwandaka mutindu ba zabisaka bawu.

Bika Mfumu kubwela masakumunu ya Yandi na ntangulu ya Ndinga ya Yandi.

¹⁶ Ntangu yayi, ya kele...Samu na yinki diambu yayi ya nene monisamaka na mivungi? Yina ke vwanda kima mosi ya ngitukulu samu na beto. Mu ke na mwa Masonuku ya kusonika awa, mpe mwa banoti yina mu ke meka na kutanga, samu na kutendula na beno *samu na yinki* na luzabu ya munu ya kulutila mbote. Mpe mu banza ti na manima ya yayi, ti Mfumu na lemvo ya Yandi, na nkokila yayi, ke katula beto *samu na yinki*. Kasi...Mingi kati ya beto, mu banza, na ntangu mosi to yankaka, vwandaka kukiyufula samu na yinki diambu yayi ya kulutila nene ya bantangu nionso me monisama pwelele na mivungi. Samu na yinki Yawu monisamaka na mivungi mpe na ba théologien ya kilumbu yina ve? Bawu vwandaka bayina longukaka na kuwa Yawu. Mpe samu na yinki Yawu me kwisa mpe me luta mvwama, mpe me kwisa na bamputu? Mpe, samu na yinki Yawu lutaka muntu ya kulunguka mpe ya ndwenga, mpe kwizaka na muntu ya kukikulumusa mpe yina me longokaka ve? Ya kele na mwa bakyuvu fyoti *samu na yinki* na yayi.

17 Ya kele samu na yina yankaka mu fwana tuba, beno tala, bébé yango butukaka na Bethlehem. Na yina Bethlehem na kati ya ntendulu ya Hebreux, mutindu beto monaka yawu na bamvula zole me luta awa, *Bethlehem* zola tuba “yinzó ya dimpa ya Nzambi.” Mpe beto talisaka na Masonuku, Yandi lendaka kwisa ve na kisika yankaka. Bethlehem bandaka na Rahab mpe bakala ya yandi—ya yandi. Rahab vwandaka kento ya kindumba yina général mosi zolaka, na makesa ya Israel, na manima ya kubaka Jéricho. Mpe na lukwikilu yandi kwikilaka Nsangu ya Nzambi, na mutindu ya yandi, mpe yandi vulukaka. Mpe kubanda kuna, ntangu Josué kabulaka bantoto ya kisika mosi na mosi lendaka vwanda, . . .

18 Mpe ya kele na leso ya nene yina ntangu yankaka mu banza ti mu ke vwanda na kiyeka ya kulonga na Tucson, samu na bamama yina ya ba-Hebreux yina vwandaka kubuta ba-bébé yina. Ntangu yandi vwandaka boka na mpasi ya kubuta ya bébé yina, yandi vwandaka bokila nkumbu ya bébé mpe yina vwandaka tula yandi na kisika na yinsi ya nsilulu, ya kele dikanda. Kima ya nene, Ndinga nionso ya Nzambi ke ya kulunga kintwadi. Kana yawu me lunga ve kintwadi, yawu ke Ndinga ya Nzambi ve yina me lunga ve, yawu kele dibanza ya beno kele ve ya kulunga na Ndinga. Yawu nionso me lunga kintwadi.

19 Na yina, na yina, Yandi vwandaka Dimpa ya Luzingu, mutindu beto longaka sabala me luta na Phoenix, to sabala mosi na ntwala ya yawu. Mpe na kuvwandaka Dimpa ya Luzingu, Yandi lendaka ve kukwisa kisika yankaka kasi na “*yinzó ya dimpa ya Nzambi*.” Mpe yawu yina vwandaka *samu na yinki*. Ntangu yayi, awa, Yesu me butuka na Bethlehem, mpe na Bethlehem ya vwandaka na synagogue, bantwadisi ya nene ya nsambulu vwandaka zinga na Bethlehem. David ntinu-muvungi ya nene butukaka na Bethlehem, tata ya yandi Jesse butukaka na Bethlehem, nkooko ya yandi ya bakala Obed butukaka na Bethlehem. Mpe, ntama kuna, yandi kwisaka na Bethlehem.

20 Mpe awa, Yesu Mwana ya David butukaka na Bethlehem, na nsi ya bivudi ya ba-cathédrale ya nene. Na yina kana bantu yina me longukaka, mpe bawu vwandaka sosa Mesiya bamvula yayi nionso; bamvula mafunda yiya, ba pesaka profesi ti Mesiya ke kwisa. Mpe kuna kana Mesiya kubutukaka na kivudi ya cathédrale, samu na yinki bawu mataka mbala mosi na zulu ya bamongo na nkonga ya mivungi yina me longokaka ve, yina me zabaka kima mosi ve samu na kunata Nsangu ya nene, Nsangu ya ntete? Mpe mivungi kuzwaka lutumu! Bantu ya ndwenga ve mpe yina me longukaka, kasi mivungi. Ya ke kima ya ngitukulu, mutindu yina ve? Kasi ya fwana vwanda na *samu na yinki* mosi kuna. . . Ya ke na *samu na yinki*, ntangu yayi ya fwana vwanda na mvutu samu na samu na yinki! Mpe muntu ve zaba mvutu ya Nzambi. Yandi kele Yandi yina zaba mvutu.

²¹ Ntangu yayi, beno bambuka moyo, Mesiya vwandaka ntete na mbanza, yina butamaka na mbanza, na kati ya kidikilu; kaka na nzila ya ba-cathédrale ya nene kisika nganga-nzambi ya ntete. . . mpe banganga-nzambi ya nene, mpe ba-théologien, mpe bantu ya ndwenga, mpe bayina longokaka, bawu nyonso vwandaka vingila Mesiya. Mpe kuna Yandi vwandaka, kaka na kati-kati ya bawu! Kasi samu na yinki bawu kwendaka na . . . kuna na bamongo ya Judée na bantu yina nionso me longakaka ve, yina zabaka kima mosi ve, yina vwandaka na nkadulu ve, ya bamputu mingi? Ba monanaka mutindu bantu yina me lunga ve samu na kisalu yina, samu na kotalisa Nsangu mpe kufidisa bawu kuna samu na kulonga Nsangu.

²² Beno zaba dibanza ya munu? Ya lenda vwanda kima ya nene ve, kasi mu zola lutisa dibanza ya munu: Mu ke kwikila ti ya kele samu na ndwenga ya Nzambi, ti Yandi zabaka ti ba ke ndima ve Nsangu ya mutindu yina ntangu Yawu ke kwisa. Ya vwandaka ve na kati ya ntomo ya luzabu ya bawu. Ya vwandaka ya kuswaswana. Ya vwandaka ve yina ba longisaka bawu na kukwikila nutindu Yandi zolaka vwanda. Ya vwandaka ya kuswaswana na lubakusu ya bawu ya théologie. Malongi nionso ya bawu, mayele ya bawu vwandaka luta, vwandaka kima mosi ve. Mu ke kwikila ti ya vwandaka ndwenga ya Nzambi yina zabaka ti ba ke ndima Nsangu ya mutindu yina ve.

²³ Na yina Mesiya vwandaka awa, mpe ya zolaka vwanda na muntu yina ke ndima Yawu. Mpe Yandi zabaka bayina vwandaka ve ya kuvukana na bima ya mutindu yina. Yandi ke vwanda na lenda mingi na kuzwa nsangu ya Yandi na nkonga yina longokaka ve, kulutila Yandi ke vwanda samu na kimvuka yina ba me vukisa yina vwandaka ya kusungama mingi na banzila ya bawu ti kima mosi ve lendaka balula bawu, ata Ndinga ya Nzambi ve.

²⁴ Mpe ntangu yayi, nkundi ya Muklisto, bika mu yufula kiuvu yayi, na kieleka nionso mpe zola. Mu ke kukiyufula kaka Yandi ke sala mutindu mosi na nkokila yayi, mpe ke tinda beto na nsungi yayi Ndinga ya nsilulu yina ba silaka samu na nsungi yayi, mu ke kukiyufula kana ba-théologien ya beto, mpe balongi, mpe bantu ya ndwenga, lendaka ve kumanga Nsangu kaka mutindu bawu salaka kuna? Muntu ke sobaka ve, to Ndinga ya Nzambi ke soba ve. Yandi kele Nzambi yina ke sobaka ve, Yandi ke soba ve!

²⁵ Beno tala, Bawanzio ke na kwiza mpe. . . Bawanzio ke kwiza mpe ke pesa Nsangu ya bawu na muntu ya kitezo ya yisi mingi, na yina ya vwandaka na bantu ya kulutila (na mabanza ya ntoto) kulunga kulutila mivungi yayi ya bamputu, yina me longokaka ve. Muvungi vwandaka muntu yina me longokaka ve, yandi vwandaka na nsatu ya kuzaba kima mosi ve kasi kaka samu na mameme ya yandi. Yandi vwandaka ve na nsatu ya kuzaba ba-mathématique. Yandi vwandaka ve na nsatu ya kuzaba mutindu

ya ku—kukabula atome. Yandi vwandaka na nsatu ya luzabu ve. Yandi vwandaka zaba kaka mameme ya yandi, yawu yina kaka yandi vwandaka na yawu nsatu ya kuzaba. Mpe Nzambi, Ndwenga ya nene, mpe Kiziba mpe yinto ya ndwenga nionso, ke soola muntu ya mutindu yina (bantu, mu zola tuba, mutindu yina), mpe lutaka bantu nionso ya ndwenga yina longokaka samu na kuzaba Yawu. Yawu ke tuba kima mosi, yina bawu longokaka na kilanga ya yimbi. Lutaka bantu nionso ya mfunu ya yinsi; ba vwandaka na bantu ya kulutula mfunu, milongi ya nene, Caiphe nganga-Nzambi ya mbuta, bantu mingi yankaka ya nene, bantu nionso me longokaka ya ngolo ya Israël, ba-denomination nionso, mpe ba-théologien nionso ya lunangu ya théologie, Nzambi lutaka bawu nionso! Ntangu yayi, yina kele ndwenga ya Nzambi.

²⁶ Beno tala, Mazulu ya Zulu mingi ke sala nswalu samu na kupesa lukumu na bantu ya kukikulumusa mingi mpe yina me longokaka ve ya ntoto. Mazulu ya Zulu mingi kulumukaka samu na kusala Yandi mosi kuzabana na yisi ya ntoto, na kulutaka nionso na kati-kati samu na kukitalisa Yandi mosi na mivungi ya mumesanu; samu na kukwisa kupesa mivungi yayi ya mumesanu ya Nsangu ya kulutula nene ya bantangu nionso. Ya vwandaka na minati-nsangu mingi ya nene. Beto ke banza na kilumbu ya Noé, mpe bapofete, mpe—mpe banganga-Nzambi ya nene, mpe nionso yina, vwandaka na bilumbu yina me luta. Muntu ya nene yina longokaka, bantinu, ba—potentat, kasi awa Yandi me kwisa na yina ya kulutula nene ya Bansangu nionso. Yinki vwandaka Nsangu? “Mesiya kele awa ntangu yayi!” Beno me mona? Mpe samu na kusala yina kuzabana, Yandi lutaka bayina nionso longokaka, samu na kuzabisa yawu na mivungi ya kukikulumusa.

²⁷ Beno banza na yawu: banganga-Nzambi nionso, bantu nionso ya dibuundu, milongisi nionso, malongi nionso ya théologie, mbongo nionso ba vwandaka basisa, mabuundu nionso, mpe malongi, mpe ba-denomination, lutaka bawu nionso! Malongi nionso yina bawu pesaka na ba-missionaire nionso—nionso, mpe luzatu nionso, bumambele nionso, bima nionso yina bawu banzaka ti ba vwandaka kupesa lukumu na Nzambi, kasi Nsangu ya ngudi na yawu nyonso vwandaka ya kukangama na yawu. Ya ngitukulu! Samu na yinki? Beno me mona?

²⁸ Mpe beno tala, kaka yina ve, kasi kisika ya mpamba-mpamba samu na kima yina. Mivungi, ntangu yayi, vwandaka bawu yina yambaka Nsangu. Mpe ntangu yayi beno tala kisika Nsangu vwandaka: na kisika mosi ya mpamba-mpamba yina muntu nionso lendaka vingila Yawu na kukwisa. Mpe mu ke kukiyufula, na nkokila yayi, kana beto vwandaka vingila Nsangu ya kieleka ya Mfumu Yesu, mu ke kukiyufula kana Ya ke vwanda na kimvuka ya mpamba-mpamba ve, kisika

yina vwandaka . . . ti yinza ya nene, ya kulonguka mingi mpe dibuundu bubu yayi ke banza ti ya vwandaka nkonga ya—ya, oh, ba-eretiki? Mu ke kukiyufula kana ya ke vwanda ve kisika yina beto ke mona Yandi? Kisika yina ba vwandaka zola ve, mpe na banzonzi yina vwandaka ya kulunga ve. Mivungi zabaka kima mosi ve samu na kutuba, yina ke bokila kaka mameme; mbote, ya lendaka vwanda samu na yina Yandi kwisaka.

²⁹ Kasi ya vwandaka na Ndinga yina ba silaka. Beno tala, ya zolaka sala yawu dyaka.

³⁰ Ya lutaka bantu nionso ya lukumu ya yinsi. Ya lutaka bantu nionso ya lukumu, mpe monisamaka na bantu ya mpamba-mpamba. Bima nionso ya luvunu yina vwandaka ya kubongisa na—na théologie ya nene ya docteur mpe—mpe psychologie, mpe—mpe malongi ya kulutula zulu, mpe ba-cathédrale ya nene mpe bima, yawu nyonso vwandaka ya kukangama na lweka mpe vwandaka monisama na muntu mosi ve. Ndwenga, ndwenga ya seko ya Nzambi ya Ngolo nionso me sala yawu, samu na kuzabisa bawu Nsangu ya kulutula nene yina me vwandaka ntete ve, “Mesiya kele ntangu yayi na zulu ya ntoto.” Wapi ndwenga! Nzambi lendaka kaka katuka na Nzambi yina me zaba ndwenga! Ndwenga nionso mpe malongi nionso ya lukolo, mpe bima nionso yina, vwandaka ntangu yayi ya vwandaka ya kubeba mpe ya vwandaka luta na lweka ya ndwenga ya nene ya Nzambi. Mu ke landila na kuzonza yawu samu ti mu zola ti ya kwenda na kati mingi. Nionso vwandaka ya kubeba, ya vwandaka mbote ve. Lutaka yawu nionso samu na kubika ndwenga ya Nzambi na kuzwa nzila ya mbote, ti Nzambi ke bakaka bima ya mpamba samu na kusala mambu ya nene.

³¹ Beto lenda telama awa mpe kuzonzila samu na Jean. Beto lenda sukisa mpe kuzonzila samu na Élie. Muntu ve zaba kisika Elie katukaka. Bawu nionso zaba, yandi kotaka kaka na kisalu. Baprofete kuna na kati ya bansungi, bawu vwandaka bantu ya mpamba. Kasi Nzambi bakaka yawu na . . . mpe tulaka mayele ya muntu nionso ya dibuundu, mpe malongi, samu na kusala . . . talisa ti Yandi kele Nzambi. Yandi ke bakaka kima yina kele kima mosi ve, ya kusala kima mosi na yawu. Yandi ke talisa ndwenga ya Yandi mpe Bunzambi ya Yandi na kusalaka mutindu yina, ti Yandi ke baka kima mosi ve. Ntangu Yandi salaka muntu ya ntete, Yandi bakaka kaka ballon ya ntoto mpe salaka muntu na yawu. Kisika ya vwandaka kima yankaka ve kasi ntoto, kasi Yandi salaka muntu. Mpe Nzambi ke bakaka kima mosi ve na ntangu yayi, samu na kusala kima yina kele na yawu. Mpe na ntangu nionso beto ke banza ti beto ke kima mosi, kuna diboko ya Nzambi lenda sadila beto ve. Beto fwana bika nionso yina beto me zaba to me longoka. [Mpangi Branham me yidika ndinga ya yandi—Mu.] (Beno lemvokila munu.) Mutindu Santu ya nene Paul, yandi tubaka ti yandi zolaka zimbana nyonso yina yandi longokaka, samu ti yandi kuzaba Klisto.

³² Malongi ya bawu nionso, malongi ya bawu nionso mpe nionso yina, vwandaka sala kisalu ya kulutila yimbi samu na bawu. Na nsuka ya me manga Yandi! Lukolo ya kulutila yina ba kuzwaka *samu* na Yandi, na kukwikila Yandi, yandi balukaka mpe kumaka mbeni ya Yandi ya kulutila masawula, mpe yandi komaka Yandi na kulunsi!

³³ Beno zaba ti disolo ke vutukilaka yawu mosi konso ntangu? Ya kele dyambu ve. Ya lendaka salama dyaka kaka na lweka ya beto. “Oh,” beno ke tuba, “Kana mu lendaka zinga na ntangu yina, . . .” Mbote, ntangu yayi, kana beno zola zaba yina beno lendaka sala, beno tala mbanza ya beno ntangu yayi; mpe beno lenda mona yina beno ke sala kuna, samu ti kieleka ya ke na kumonisama.

³⁴ Yandi longokaka na kukwikila Ndinga ya Yandi, mpe kuna ntangu Ndinga ya Yandi vwandaka ya kusiamisa na ntwala ya meso ya bawu ya kieleka, bawu mangaka Ndinga yina kumaka nsiamisa. Ntangu Nzambi siamisaka yina Yandi ke sala, mpe tubaka yina Yandi ke sala, mpe lakisaka yina Yandi ke sala, kuna bawu balukaka mpe bokilaka muntu yayi “mpeve ya yimbi” (yina singaka bawu nyonso). Beno banza yina salamaka! Beno banza yina me sala bawu; malongi ya bawu me nata bawu na kuzaba ve Ndinga ya kieleka yina me kuma nzutu samu na kilumbu ya bawu; malongi yina ti bawu kuzwaka na balukolo ya bawu, na milongi ya kulutila mbote.

³⁵ Mpe beno ke tuba, “Mbote, beto ke sala yawu ve bubu yayi.” Milongisi ya bawu vwandaka kitoko mingi na ya beto bubu yayi (ya kulutila, mu zola tuba, na milongisi ya beto), mpe bawu kubwaka. Bawu vwandaka ve na bankama yivwa mpe makumi yivwa na sambanu ya ba-organisation ya kuswaswana mutindu beto ke na yawu bubu yayi. Bawu vwandaka na tatu. Mpe na kati ya tatu, ke landa na tatu, mpe ata mosi ya tatu ya kuzaba Yawu! Ke lakisa kaka yina muntu ke salaka kele bulawu samu na Nzambi. Beno me mona?

³⁶ Ntangu yayi, bawu zabaka Yawu ve. Ntangu yayi. . . Mpe bawu ke sala diaka kima ya mutindu mosi.

³⁷ Muntu. . . Dibanza nyonso kele mbote, ya kele ntangu nyonso mbote. Mpe muntu ke sobaka ata fioti ve ntelamanu ya yandi, yandi ke sobaka ata fioti ve banzila ya yandi; mu ke tubila muntu ya yinza. Muntu ntangu nionso ke kumisaka Nzambi, muntu ya nsambulu, samu na yina Yandi salaka, mpe ke talisaka ntangu nionso na bantu yina Yandi ke sala, mpe na manima ke kipe ve yina Yandi ke na kusalaka! Beno me mona? Ya kele kaka bakala, yandi ke salaka mutindu yina, yandi kele ntangu nyonso mutindu yina. Mpe beno mitangi ya Biblia na nkokila yayi zaba ti yina kele landila Ndinga, “kieleka.” Bawu ke kumisaka Nzambi ntangu nionso yina Yandi me sala, na kutubaka yina Yandi ke

sala, mpe ke zimbana yina Yandi ke sala. Yina ke kaka kikalulu ya muntu.

³⁸ Ya kele samu na yina bawu salaka yayi, milongisi, na dibanza ya munu ntangu yayi: bawu tendulaka Ndinga, samu bawu nionso kwikilaka na nkwezulu ya Mesiya. Israel nionso kwikilaka yawu, bawu ke sala yawu bubu yayi. Kasi ya kele samu na yina bawu bakulaka *Yandi* ve, Nsangu ya Yandi vwandaka ve mutindu ya kusala na dibuundu ya bawu. Bawu . . . ntendulu ya bawu vwandaka na yawu ya Ndinga, Mesiya kukitalisaka ata fioti ve Yandi na mutindu yina bawu tendulaka yawu ti Yandi ke sala yawu. Na yawu, mpe na yina, bawu zabaka Yandi ve samu ti Yandi vwandaka ve ya kulunga na ntendulu ya bawu. Mutindu mu tubaka yawu na ntwala, mpe ke tuba diaka, “Nzambi ke na nsatu ya muntu mosi ve samu na kutendula Ndinga ya Yandi. Yandi ke mutendudi ya Yandi Mosi.”

³⁹ Ntangu yayi, Biblia ke tuba . . . Beno bika mu siamisa na beno ntangu yayi ti ya kele Kieleka. Esaie profete, bamvula bankama sambwadi na kumi na tanu na ntwala yawu salama, Esaie profete tubaka, “Mwense mosi ke kuzwa kivumu, mpe ke buta mwana.” Ya ke na ntembe ve ti muntu nionso na nsungi yina ke banzaka ti mwana ya bawu ya kento ke vwanza kento yina, samu Esaie tubaka yawu. Kasi, beno me mona, ya vwanza bamvula bankama sambwadi na ntwala. Kasi ntangu . . . Nzambi vwanza na nsatu ya muntu ve samu na kutendula Ndinga ya Yandi, ntangu Yandi ke sala yawu, to mutindu Yandi ke sala yawu. Yandi tubaka ti Yandi ke sala yawu, mpe Yandi salaka yawu!

⁴⁰ Nzambi silaka ti Yandi . . . kuna na Esaie, mpe, mu ke kwikila kapu 28, na nzila ya 18. Mpe dyaka na Joël 2:28, ti na bilumbu ya nsuka, mafunda zole ya nsuka, Yandi ke mwangisa Mpeve ya Yandi na zulu ya bantu nionso. Yandi tubaka, “Bana ya beno ya babakala mpe ya bakento ke pesa profesi. Batwenya ya beno ke mona ba-vision. Biboba ya bebo ya bakala ke lota bandosi.” Mpe bima yina Yandi ke sala, Esaie tubaka, “Na bikoba yina ke tekita mpe na bandinga yankaka mu ke tuba na bantu yayi, mpe yayi kele Kupema.” Kasi bawu vwanza kuwa Yawu ve. Bawu vwanza yidika bayintu ya bawu mpe vwanza tambula na Yawu. Yandi tubaka, “Bamesa nionso ya Nzambi ke fuluka na bilusi, mpe ya ke vwanza na kima ve ya kutsyema.” Mpe kana yina kele ve kifwani ya Jérusalem, mpe dibuundu ya kilumbu yina na nkwezulu ya Mesiya, ya kele kifwanikisu ya bubu yayi mutindu mosi. Ya ke na kuvutukilaka kaka yawu mosi.

⁴¹ Ntangu yayi, ntangu Nzambi tubaka ti Yandi ke sala kima, Yandi salaka yawu. Ata nionso yina muntu yankaka ke banzaka samu na yawu, yina muntu nionso ke tuba, na ntangu Nzambi ke tuba kima mosi, Yandi kele na kisalu ya kukangama na Ndinga yina Yandi mosi. Mpe nsiamisa ya Yandi ya Ndinga kele ntendulu ya Yandi Mosi. Beno tala, na kusiamisaka Nsangu ya Yandi ya

Mesiya. Yandi silaka yina Mesiya ke sala ntangu Yandi ke kwisa. Mpe ntangu Yandi kwisaka . . .

⁴² Mpe ntangu bantu ya ndwenga na este talaka na bisika ya sud, na yina ba vwandaka na Babylone, mpe ba monaka mbwetete ya kulutila nene. Beno zaba ti ya kele ve na kitini ya masolo, kisika mosi ve, ti ba-observatoire nionso (wapi kisika bawu vwandaka tanga ntangu na kulandaka bambwetete, muntu ya nene yina longukaka bambwetete yayi) . . . Ya kele ve na disolo ke tubaka ti bawu nionso monaka mbwetete yina na mutindu nionso. Samu na yinki? Ba pesaka bawu yawu ve, bawu vwandaka sosa kima ya mutindu yina ve. Kasi muntu ya ndwenga yayi zabaka ti ya ke vwanda na Mbwetete ya Jacob yina ke telama, mpe bawu vwandaka sosa Yawu, mpe Yawu lutaka kubanda na ntangu yina Yesu butukaka na Bethlehem . . .

⁴³ Ntangu yayi, mu zaba binkulu ya beto Baklisto, ya ke kaka mutindu mabuundu ya beto, ya ke na mambu ya kulutila yimbi. Beno ke basika awa mpe beno ke mona muntu ya ndwenga kukwiza samu na kusambila bébé; ya kele ve na kima mutindu yina na Masonuku. Bamvula zole na ntwala bawu kwendaka kuna, kulumukaka na ba-plaine mpe zabukaka Nzadi Tigre. Ata mbala mosi ve ti ba kwizaka samu na kukembila mwana ya fyoti, kasi ntwenya ya fyoti pene ya bamvula zole. Samu na yinki ya vwandaka, na ntangu yina mosi, Hérode kufwaka bana ya bawu nionso kubanda bamvula zole na nsi? Samu ti yandi simba Mesiya. Beno me mona, bawu . . . Nzambi vwandaka siamisa na nzila ya Ndinga ya Yandi.

⁴⁴ Mpe na ntangu muntu yayi ya ndwenga kwisaka na Jérusalem . . . Mbwetete twadisaka bawu na capitole ya misambidi ya yinza, na Jérusalem. Mpe ntangu bawu kotaka na mielo yango, mbwetete yango (kima ya kimpeve yina twadisaka bawu) mangaka na kulakisa bawu dyaka. Kumata mpe kukulumuka babala-bala bakala yayi ya mbote, ya mvwama na kamela ya kufika bilele ya mbote, mpe nionso yina . . . kumata mpe kukulumuka babala-bala na kutubaka, “Wapi kisika Yandi kele yina me butuka Ntinu ya ba-Juif. Beto me mona mbwetete ya Yandi na este.” Mpe capitole ya nene ya misambidi, na manima ya bamvula zole ya Nsangu ya muvungi, kasi ba vwandaka kaka ve na mvutu to ba zabaka kima mosi samu na Yawu. Yintu ya ba-denomination nionso vwandaka ve na mvutu.

⁴⁵ Na yina yawu yangisaka ba-Sanhédrin, mpe ba bokilaka ba-Scribe samu na kukwisa kutanga. Mpe bawu tangaka disolo ya Michée, profete yina tubaka, “Nge kele Bethlehem, nge kele ve ya kulutila fioti na kati ya bambanza ya Judée (ya kulutila fioti), kasi kuna nge ke kwisa muntu ya lukumu ke twadisa bantu ya Munu, Israel.” Mpe na manima ba tangaka Masonuku (mpe ba ndimaka na ntwala ya meso ya bawu), bawu vwandaka ndima Yawu kaka ve, ata ti Masonuku me tuba mutindu yina. Mu ke

tula ntembe mingi ti bawu lunga bubu yayi, kana Masonuku yina ba silaka samu na bubu yayi ke monisama. Mu lunga longa beno diaka ve, kasi mu zola ti beno bakula yayi. Kasi bawu ke kwikila kaka ve!

⁴⁶ Ndwenga ya nene ya Tata ke sala ti ndwenga ya muntu ya kulutila bulaw ti Yandi ke kulumusa muntu. Ya kieleka yandi ke kwisaka na kisika yina ya ke salaka ti bantu kuvwanda na nsoni ya yandi mosi, mpe yandi me lunga ve na kundima ti yandi kele “na yimbi.” Yandi ke vwandaka kaka na disolo ya yandi, ata wapi mutindu Tata ke talisa ti Ndinga ya Yandi kele kieleka mpe Yandi ke na kusalaka kaka yina Yandi silaka na kusala. Muntu ke banzaka ti ndwenga ya yandi kele ya kulutila nene na ntwala ya Nzambi, kana ya me kwisa ve landila ndwenga ya yandi, “Kasi, Ya ke mutindu yina ve.” Ya kele kieleka na konso nsungi, ke salaka yawu kaka. Beno me mona mutindu diambu nionso vwandaka ya kulunga, ntangu yayi?

⁴⁷ Yinki lutwadusu ya kimpeve na mivungi yina! Bawanzio kulumukaka samu na kutuba na mivungi, Bawanzio ya Nzambi ke kulumuka samu na kutuba na nkonga ya mivungi.

⁴⁸ Mu ke kukiyufula kana beno me kuzwaka ntangu ya mbote ya—ya kutuba na mivungi to kuvwanda na mosi, na mwa ntangu fioti? Kana beno zola, mu—mu zola tuba yawu ve samu na mulabu ya munu ti mu zola tuba na manima ya mwa ntangu fioti, kasi mivungi ke vwanda na mameme mingi tii kuna yandi ke seka mutindu mameme (ke dila), yandi ke tuba mutindu dimeme, mpe yandi ke waka nsunga ya mutindu mameme. Ya kieleka, samu yandi kele na dimeme. Yawu yina kaka yandi zaba, kele mameme ya yandi.

⁴⁹ Ntangu yayi, Ndinga ya Kieleka yina me siamisama. Ntangu mivungi yayi, ya kukikulumusa, ya kukondwa kulonguka... Wapi lukumu, mutindu ya ke mbote samu na mivungi na kuyamba nsangu ya mbutukulu ya dimeme. Ya lendaka kwisa na kima yankaka ve kasi na mivungi. Yawu yina Yandi butukaka na kati ya kidikilu, mpe na yinzo ve. Mameme ke butukaka ve na kati ya yinzo, to na kati ya lupitalu ya kitoko ya bafelele. Beno me mona? Bawu me butukaka na kidikilu, mpe na bilanga ya bawu.

⁵⁰ Kikuma yawu yina Yandi *twadisaka* na Calvaire. Beno lunga sala ve dimeme kutambula na nzila ya nzengolo ya kibakala na abattoire. Beno zaba yawu? Na ba-abattoir, bawu ke na nkombo yina ke twadisaka dimeme. Mpe ntangu yandi ke kuma na kisika yina ba ke kufwaka, yandi ke dumuka mpe ke bika dimeme kukwenda na ntwala. Ba ke twadisa mameme, yandi lenda ve kutwadisa yandi mosi. Na yina, na yina, ya fwana vwanda mivungi samu na...dimeme ya yandi. Ntangu ba monaka Nzambi-bébé kieleka kisika munati-nsangu tubaka ti Yandi ke vwanda, mpe ntangu bawu monaka Nsangu yayi ya

munati nsangu na kati ya kidikilu, kieleka kisika Wanzio tubaka ti Yawu ke vwanda.

⁵¹ Ntangu yayi, mu kuwaka bantu kutuba, “Wanzio mosi me zonga na munu, Yandi tubaka, *‘yayi mpe yayi.’*” Wapi mutindu buzoba na bantangu yankaka; mpe mu me kuwa bantu ke tuba ti Wanzio mosi me zonga na bawu, mpe tubaka na bawu “*yayi mpe yayi*” yina vwandaka kieleka ya kuswaswana na Ndinga. Ntangu yayi, wapi mutindu Wanzio lenda sala yawu? Ya zolaka vwanda kaka ve. Mpe kana Nzambi tubaka na beno ti kima *yayi* ke salama (beno ke *tuba* ti Yandi tubaka na beno yawu), mpe yawu ke salama ve, kuna ya vwandaka ve Nzambi yina vwandaka zonga na beno. Beno bambuka kaka moyo, ya kele kieleka. Nzambi ke vunaka ve. Yandi kele ve na luvunu.

⁵² Ntangu ba monaka Bébé, yinki kiese ya zolaka vwanda samu na bawu. Samu Wanzio yina pesaka bawu nsangu, bawu monaka yawu kaka kieleka mutindu Wanzio tubaka ti ya ke vwanda, mpe kaka na kisika yina Wanzio tubaka ti ya ke vwanda. Wapi kima yina zolaka vwanda samu na bawu!

⁵³ Na kati ya kidikilu, samu na yinki? Beno me mona wapi mutindi na kiese mivungi yayi vwandaka na kati ya kidikilu? Yinki beno ke banza ti théologien mosi me vwanda kuna? Yandi ke tula mbombo ya yandi, mpe ke tuba, “Basisa munu na kisika yayi.” Beno me mona? Yandi zolaka vwanda mingi na ngaanda ya kisika, yandi ke vwanda na kati ya mpasi.

⁵⁴ Kasi, beno me mona, ya vwandaka “kaka na yinzo” na mivungi. Nzambi zaba kisika ya kufidisa Nsangu ya Yandi. Beno me mona? Ya kieleka kaka. Na kizunga yayi mivungi vwandaka na ntangu yina, na kidikilu ya bawu na Mwana-dimeme ya bawu, Nsangu yina ba me siamisa yina bawu kuwaka. Ya ke kitoko mingi! Na ntwala ya Mesiya, Ndinga yina me siamisama ya Nsangu ya bawu. Ntangu mivungi kuwaka ti Mesiya vwandaka na zulu ya ntoto, mpe kotaka na mvwandulu ya Yandi, kaka na kati ya kizunga ya bawu mosi, (mpe monaka ti Nsangu vwandaka kieleka, ya me siamisama kuna) wapi mutindu yina fwana sala bantu yina kuwa, kumona ti Nzambi me sala kima yayi ya nene samu na bawu.

⁵⁵ Na yina, bantu ya mayele zolaka vwanda na ngaanda ya kisika yina kuna, na nsi ya mambu ya mutindi yina, ba zolaka katuka kuna na nswalu nionso. Samu na yinki? Munati-nsangu ke kwisa na mivungi ya mumesanu. Ya lendaka vwanda ti bawu lendaka ve. . . bayayi. . . Ndambu ya mivungi yayi lenda ve kusinie bankumbu ya bawu, na mpasi mingi. Beno zaba mivungi yina Yesu soolaka ntangu Yandi vwandaka awa na zulu ya ntoto, samu na kudisa mameme ya Yandi, “Nge zola Munu, Pierre, kulutila bayayi?”

⁵⁶ “Yinga, Mfumu, Nge zaba ti mu zola Nge.”

57 “Disa mameme ya Munu.” Mpe Biblia ke tuba ti Pierre vwandaka muntu yina zabaka kima ve mpe muntu yina longokaka ve. Kena kusolaka dyaka mivungi.

58 Bamambele ya dibuundu ya bilumbu yina me luta, mpe banganga-Nzambi, mpe kompani yina me longokaka mbote na kilumbu yina zolaka vwanda ntama mingi na kisika yango na kati ya kidikilu. Ntangu yayi, mu me ndima ve ti mingi kati ya beno lendaka bakula (mbala yankaka, beno bantu ya mbanza) wapi mutindu nsunga ya kidikilu ya bantu ya Juda vwandaka, wapi mutindu ya vwandaka, mutindu bibulu na kati ya kidikilu yina, mpe wapi mutindu ya zolaka vwanda. Na yina, ndambu ya bantu yayi ya lukumu ya bubu yayi zolaka vwananda ntama ya kisika yina kuna, ba—ba zolaka kukota ve na kielo. Kasi yawu sepelisaka Nzambi, na ndwenga ya Yandi ya seko, samu na kumonisa Yawu na na bayina zolaka kuyamba Yawu. Bantu ya mayele, mpe muntu ya ndwenga ya kilumbu yina kieleka zolaka ndima Yawu ve. Bawu zolaka vwanda na nsi mingi na kuvwanda na kisika ya mutindu yina.

59 Mbote, kisika ya ntete, kana bawu zolaka vutuka na dibuundu ya bawu, mpe ba zolaka pesa kimbangi ti ba vwandaka na lukutakanu ya mutindu yina, mpe kwikilaka nkonga ya mivungi yina me longokaka ve na kunata diambu ya nene mutindu yina, ba zolaka tula bawu na ngaanda ya kimvuka ya dibuundu ya bawu. Ba zolaka losa bawu na ngaanda ya kimvuka ya Bethlehem, kana ba kangaka bawu na kuwa nkonga mosi ya bantu yina longokaka ve mutindu mivungi yayi vwandaka. Ya kukikulumusana mingi, ya kieleka ba zolaka vwanda. Kana bawu vwananda na kimvuka na bantu yayi ya mumesanu, mpe na kuvwandaka . . . na kundimaka binzambi-nzambi yina samu na kukwikila ti Nzambi ke nata Nsangu ya Yandi na nkonga ya mivungi yina me longakaka ve, ntangu bawu yidikaka nionso samu na yawu. Bawu zolaka zimbisa ngwisani ya bawu, bawu zolaka pesa bawu mikanda ya bawu, mpe zolaka vwanda ve na kiyeka ya kundimama na kati ya kompani ya bimvuka ya bawu ya kilumbu yina; samu bawu vwananda na ngwisani na kima ya mutindu yina, kasi na dibanza ya kulutila mbote ve.

60 “Wapi mutindu beno lendaka!” nganga-Nzambi zolaka tuba. “Beno ke kwisa na sanctuaire ya munu awa na kinzambi-nzambi ya mutindu yina, na bulawu ya mutindu yina, ti bantu ya banseke me longokaka ve yina kuna lendaka ve . . . kwendaka ve . . . na muntu ya lukolo ya bana. Mpe zolaka kwikila nsangu ya mutindu yayi, ti, ‘Wanzio me kulumuka mpe me zonga na bawu?’”

61 Kasi yinki kana muntu yayi zolaka tuba, “Mu monaka Nsangu ya yandi me siamisama”?

62 Yandi tubaka, “Bika mu pesa beno ba-papie ya beno na nswalu nionso. Mpe mu ke basika na kimvuka yayi!” Bantangu

ke sobaka, kasi bantu ve. Ya lendaka salama diaka bubu yayi, ba ke losa bawu na nganda ya mabuundu ya bawu.

⁶³ Kasi mivungi kuwaka ya muvimba mbote na kisika yina na Mwana-dimeme ya Nzambi. Mpe muvungi nionso ya mbote ke sala mutindu mosi. Ntangu muvungi ya mbote samu mameme lenda mona Ndinga ya Nzambi me monisama pwelele mpe me siamisama, ya yina Yandi silaka na kusala, muvungi yina kele kuna na yinzo. Mu ke kipe ve yina muntu yankaka ke tuba, ya kele “Nzambi silaka Yawu, mpe Nzambi salaka Yawu.”

⁶⁴ Ba ke tuba, “Bilumbu ya bimangu me luta. Ya kele ve na kima mutindu Mbotika ya Mpeve. Ya kele ve na kima mutindu Mbotika ya Mpeve-Santu, yina vwandaka samu na bantumwa.”

⁶⁵ Kasi beno bika muvungi ya kieleka ya Ndinga kulonga Yawu, na ngolo ya mvumbukulu, ti Yesu Klisto kele mutindu mosi mazono, bubu yayi, mpe kukonda nsuka! Pierre tubaka na kilumbu ya Pantekote, “Nsilulu kele samu na beno, mpe samu na bana ya beno, mpe samu na bayina kele ntama, ata mpe lutangu mutindu Mfumu Nzambi ya beto ke bokila.” Kisika nyonso Yandi ke bokila, nsilulu mpe lusakumunu mosi kele kieleka. Mpe bika muvungi ya kieleka yina ke disaka na Ndinga kumona yawu me siamisama, ba-théologien nionso na yinza lenda ve kukatula Yawu na yandi; samu yandi zaba ti Nzambi tubaka mutindu yina, mpe ya ke salama. Kaka yina. Ya kele kaka Ndinga ya Nzambi ntangu nyonso. Ndinga ya Yandi kumaka nsuni mpe zingaka na kati ya bawu, mpe bawu zabaka Yawu ve.

⁶⁶ Yandi silaka kima ya mutindu mosi na kilumbu yayi. Mu ke kukiyufula kana beto ke ndima Yawu? Bantu ya lunangu mpe ya ndwenga me kuzwaka ntete ve kima ya mutindu yina. Mpe bawu kwikilaka ti kana ya vwandaka na kima ya mutindu yina mutindu Mesiya na zulu ya ntoto, Kieleka ya zolaka kwisa na denomination ya bawu. Ya ke vwanda nkonga ya bawu yina ke yamba Yawu, to “Ya vwandaka kieleka ve.” Ntangu yayi, beno banza kaka na ngolo. Kana ya kele ve na kati ya nkonga ya bawu, kuna . . . Beno me tala, kuna? Nzambi me soolaka ata fioti ve kimvuka na bawu, kasi Yandi soolaka ti yina vwandaka wisana ve na mosi ya yawu. Samu ti nkonga mosi ke tuba, “Beno ke mona yina beto me sala?” Mpe bawu ke sala mutindu mosi bubu yayi. Kasi Nzambi soolaka muntu mosi ve, ya kele samu na yina Yandi soolaka muvungi. Mivungi vwandaka ya muvimba na yinzo ya Nzambi-dimeme na kati ya bawu, Ndinga ya Yandi me kuma nsuni na kati ya bawu. Bantu ya lunangu mpe ya ndwenga kuzwaka Yawu ata fioti ve, lutaka na lweka ya bawu.

⁶⁷ Mpe beto lenda tuba mutindu yina bubu yayi, to na nsungi mosi. Ya vwandaka bima ya mutindu mosi na bilumbu ya Martin Luther. Kima ya mutindu mosi na bilumbu ya John Wesley. Ya vwandaka bima ya mutindu mosi na bilumbu ya ba-Pentecotiste. Kasi Nzambi ke bikaka organisation ya muntu mosi ve! Yandi

ke sepelisa Mpeve ya Yandi na zulu samu na kusiamisa Ndinga ya Yandi! Ya zolaka vwanda mpe kwisaka na kalasi ya kimvuka ya bawu mosi to ba zolaka ve kundima Yawu. Mutindu ba ke na kubwa mingi na yintu bubu yayi, mabuundu nionso, ti bawu ke “sala *yayi-mpe-yayi*, mpe ke vukisa mabuundu nionso kintwadi.” Kana ba ke na kuvingila munati nsangu mosi ntangu yayi, yina lenda vukisa ba-Protestant nionso, ba-Catholique mpe ba-Orthodox, nionso kintwadi, ke sala dibuundu mosi ya nene.

⁶⁸ Ntangu yayi, bampangi, mu me kuzwa ntangu ya mbote ya kulonga na bankama ya bansambulu ya mutindu na mutindu, mpe ya kele na bantu ya mbote na kati ya bawu nyonso. Kasi ntangu yayi, beno ke bambuka moyo, mu ke na kupesaka profesu, “Konso organisation fwana ndima yayi, to ya ke vwanda organisation mosi ve. Ya ke pusa beno na ngolo.” Beno me tanga zulunale ya Tucson bubu yayi kisika banganga-Nzambi ya Catholique vwandaka sadisa na kutumama, na kati ya zulunale . . . kusadisa na kutumama, na Missouri, nganga-Nzambi ya Protestant? Mpe nani vwandaka ndima yawu? ba-Presbytérien, ba-Baptiste, ba-Lutherien, mpe ba-Assemblée ya Nzambi. Ya kele na kati ya zulunale ya Tucson bubu yayi.

⁶⁹ Oh, ya ke sala mpassi! Ya kele ve muntu kuna na kati, ya kele bantwadisi yayi ya banganga-Nzambi, ya luyalu yina ke tengimisa kima kuna na kati, systeme yina ke kotisa beno na yawu kana beno zola to ve. Beno lenda dyaka ve kuvwanda organisation mpe kutina nganzi yayi yina ke na kwiza na zulu ya ntoto, mpe beno ke mona kana ya kele kieleka ve. Mu banza mu ke vwanda me kwenda ntangu ya ke salama, beno tala na mosi ya ba-bande yayi. Mpe kuna kana ya vwandaka ve, mu kele mbandi ya luvunu. Kana ya vwandaka, mu me tuba Kieleka.

⁷⁰ Ba zolaka bokila Yawu “mwa kisalu ya mpeve ya yimbi” ya kuswaswana na mabanza ya bawu ya mbote. Beno ke kuwaka mambu mingi bubu yayi samu na dibanza ya mbote: beno ke tula kaka mabanza ya beno na zulu ya kima mosi, mpe beno ke banza na yawu. Diabulu lenda sala yawu! Ya kele kaka na kima mosi yina ke yala na zulu ya nionso, mpe ya kele Ndinga ya Nzambi. Kana beno ke na kubanza mutindu yankaka na Ndinga, beno zimbana mabanza ya beno. Beno banza na Ndinga.

⁷¹ “Mesiya,” bawu banzaka, “lendaka vwanda ve na kisika ya mutindu yina, na mvindu mutindu yina.”

⁷² Beno lenda banza na nganga-Nzambi ya nene, ya mbuta, to ya banganga-Nzambi, yina me longukaka mingi théologie, zolaka kulumuka na kidikilu ya kufuluka na fumier? Mpe kundima Nsangu ya muvungi ya mputu, ya kukikulumusa yina me longukaka ve, mpe ke kwisa tuba “Benome mona, mu lenda talisa Yandi na nge, yayi kele Bébé, yayi kele Munati nsangu?”

73 Mpe beno zaba yina bantu yina tubaka? “Muntu yayi kele ya kusungama, yandi kele kieleka ya kusungama na yina Yandi ke tuba, kasi kieleka yandi kele ya luvunu!”

74 Mu me monaka bantu kuzinga luzingu ya mbote-mbote tii kuna bantu ke kwikila ve, bawu lenda tuba kima mosi ve samu na bawu, kasi bawu ke tuba “Yandi kele ya kieleka na luvunu. Yandi zaba kaka ve yina yandi ke na kutuba. Nzambi, Yandi lenda sala ve kima ya mutindu yina.”

75 Kasi awa ba vwandaka na nzikisa! Mpe na manima ya nzikisa, “Mata kuna na zulu mpe tala kana Bébé yina kele ve ya kulala kuna.”

76 Ba ke tuba, “Nge me zimbana mpeve ya yimbi, yina me sala ti nge tuba mutindu yayi.” Kasi ya vwandaka landila Ndinga ya Nzambi! Mpe bawu vwandaka ya kufwa meso mingi na kumona Yawu, samu théologie ya bawu vwandaka me kufwa meso ya bawu. Yinki diambu ya mpasi yayi!

77 “Ba me simba yawu na kisika ya mutindu yina? Na kati ya mvindu ya mutindu yayi?” Ntangu ba vwandaka na kisika ya kitoko samu na Yandi na kukwisa, ba vwandaka na bima nionso ya kukubika samu na Yandi na kukwisa, mpe kuna kubanza ti Yandi ke kulumuka (mpe ke kwenda) mpe ke nata ve milongi ya bawu na Nsangu. “Mpe ke pesa Yawu na nkonga ya mivungi yina longokaka ve? Mpe kuna kunata Mwana ya Yandi mosi, mpe kuzwa Yandi ya kubutama na kidikilu? Kisika ya kubutula ya mumesanu? Mbote, na—na kidikilu? Samu na yinki, ya lendaka vwanda mutindu yina ve!” Bawu ke kwikila Yawu ve, samu Yawu vwandaka ya kulemvuka mingi.

78 Mpe Ya kele ya kukikulumusa mingi, ya kele mutindu yina muntu ya ndwenga ke zimbanaka Yawu ntangu nionso. Ya kele ya kukikulumusa mingi, Ya ke yitukisa bawu. Ba talaka Nzambi na ngaanda kuna, ntangu Yandi kele kaka awa. Beno me mona? Ba ke na kuingila kima mosi kuna, ntangu ya kele kaka awa na bawu ntangu yayi: Klisto, yina me vumbuka na lufwa, mutindu mosi mazono, bubu yayi, mpe kukonda nsuka.

79 Bima ya bawu nionso ya nene vwandaka luta. Kasi ya kieleka ya vwandaka Kieleka, ti “ya vwandaka na Mesiya.” Beto zaba yawu bubu yayi. Beto ke kwikila yawu bubu yayi. Beto ke ndima yawu bubu yayi.

80 Kasi na yina kana Nzambi silaka kima mosi samu na Nowele yayi, silaka kima mosi samu na kilumbu yayi, mpe kutalisa ti Yawu ke mutindu yina, mpe beto ke kwenda ntama na Yawu, beto kele kaka na kalasi mosi yina vwandaka (kuna na kilumbu yina) yina vwandaka luta na lweka ya Yawu; samu ti Yawu ke—ke kwisaka ve na ntomo ya denomination ya beto. Kikuma yawu yina beto ke na mvindu ya mutindu yayi ya Nowele.

81 Yesu Klisto kele ya kufwa ve, Yandi kele moyo. Yandi kele awa bubu yayi! Biblia me tuba, “Yandi kele mutindu mosi

mazono, bubu yayi, mpe kukonda nsuka.” Yandi tubaka, na Santu Jean 14:12, “Yandi yina ke kwikila na Munu . . .” (yandi yina ke kwikila ve, yandi yina ke *tuba* ti yandi ke kwikila) “Yandi yina ke kwikila na Munu, yandi mpe ke sala bisalu yina Mu ke sala. Mpe ya kulutila yandi ke sala, samu mu ke kwenda na Tata.” Mpe mu me mona Yandi, na luzingu ya munu mosi, ke sala bisalu ya mutindu mosi (yina Yandi salaka kuna) kasi ba sonikaka na kati ya matiti ya Biblia yayi. Mpe ya ke mata na zulu ya yintu mpe na dyambu ya ndwenga bubu yayi, mpe me monana na bana ya fyoti yina zola longoka; mutindu Yesu sambilaka samu na bawu. Ya kele kieleka, Yandi me sala ya kulutila Yandi . . . Mu me mona na kilumbu ya munu, na kati ya bamvula makumi tatu na tatu ya ministere ya munu, Mu me mona Yandi ke sala ya kulutila yina mu me tanga na Yandi na kusala na kati ya Biblia; na kima ya mutindu mosi.

⁸² Kasi ata yina Yandi me sala na ntangu yina, beno ke banza ti Kimvuka ya bakuluntu me kwikila Yandi? “Mbote,” bawu tubaka, “ba me lokama.” Kasi, beno tala, kisika ba me sala kifu ya bawu vwandaka na kumona . . . na kumonaka, ve yina credo ya bawu vwandaka tuba, kasi yina Ndinga tubaka ti Mesiya ke sala na kilumbu ya bawu. Mpe kele kisika yina beto ke sala kifu bubu yayi, beto ke longuka Masonuku ve. Yesu tubaka na bawu, “Benoni longuka Masonuku, na Yawu beno ke banza ti beno kele na Luzingu ya Kukonda nsuka, mpe Yawu kele Yawu yina ke pesa kimbangi ya Munu. Bawu ke tuba na beno Nani Mu kele.”

⁸³ Benoni tala, Nzambi zabaka na ntwala ti bawu ke sala mutindu yayi, ya kele kaka *samu na yina* Yandi zolaka kubaka Yawu na mivungi. Yandi zabaka ti bawu ke sala yawu ve, bawu ke ndima Yawu ve. Ntangu yayi beno ke mona samu na yinki bawu vwandaka na mivungi? Samu na yinki mivungi? Ba théologien lungaka ndima Yawu ve. Samu na yinki mivungi diaka? Yawu lendaka vwanza ya kuswaswana na Ndinga ya Yandi? Ve! Bawu vwandaka mivungi, bawu zabaka mameme; mpe yawu yina Yandi butukaka, dimeme, mwana-dimeme. Benoni tala, Yandi vwanza Mwana-dimeme. Ba vwanza—ba vwanza kaka mutindu yina lendaka kundima Yandi. Muvungi vwanza kima mosi kaka lendaka ndima Mwana-dimeme. Bawu zabaka wapi mutindu kukeba Yawu, mpe mutindu mosi ya kele bubu yayi ntangu beto ke baka Nsangu ya Mwana-Dimeme.

⁸⁴ Ntangu yayi kubula! Bakala yina ya kukikulumusa mingi, yina me longukaka ve ke sambila Emmanuel na kati ya kidikilu. Ya kulutila . . . Mpe ya vwanza na bantu kuna, na bilumbu mosi, yina vwanza longa théologie ya bawu. Nkonga ya bantu ya nene, ke na kubaka bisika nionso, bisika nionso na yinsi, bawu kwisaka na minkayulu yina Yehowa tubaka vwanza “na nsunga ya yimbi na mbombo ya Yandi.” Mpe awa vwanza mivungi ya kukikulumusa, na kati ya kidikilu, ke fukimina Emmanuel; Nzambi Yandi mosi me kuma nsuni, mpe me lala na

kati ya kidikilu. Beno me mona, mutindu beto kele na luzabu ya beto ya nene, mpe bayintu ya beto ke tala mutindu beto zaba kima mosi, mpe Nzambi ke salaka kima ya muvimba. Beno me mona? Yandi ke sala yina Yandi silaka na kusala, mpe Yandi ke sala yawu ntangu nionso. Kasi beno banza na mivungi yayi ya nsi mingi kuna ntangu yayi ke fukimina Emman- . . . Emmanuel na kati ya kidikilu. Ya ke bula ngolo. Ya kieleka!

⁸⁵ Na yina. . . Na manima bawu fukiminaka Yandi, mpe bakulaka ti Nsangu yina bawu longaka me siamisama, kuna bawu kele. . . ba vwandaka kumisa Nzambi na Nsangu ya kulutila nene ya Wanzio. Ntangu yayi beno fwanikisa yawu na bubu yayi. Beno vingila fioti mpe beno banza. Muntu ke na kukembila Nzambi, mpe ke na kukumisa Yandi samu na yina bawu kumonaka, yina bawu kuwaka, yina bawu zabaka vwandaka Kieleka, na Nsangu yina vwandaka kulutila nene samu na dibanza ya kimuntu. Ya vwandaka ya kuswaswana na dibanza ya dibuundu nyonso, mpe dyaka ya vwandaka Kieleka! Ya kele Kieleka! Bawu kwikilaka Yawu. Mpe ntangu yayi, wapi mutindu bulawu lenda vwanda ndwenga ya muntu! Na yina na kutubaka ti Wanzio ya chorale vwanda yimbila na bawu nowele ya ntete. Beno lenda banza na yawu? Ti mivungi yina lendaka ve kusonika nkumbu ya yandi, vwandaka na nsunga mutindu lupangu ya mameme, vwandaka tambula kuna na bala-bala, na kubokaka, “Nkembo na Nzambi na Mazulu! Beto zaba ti Yandi kele na zulu ya ntoto!”

⁸⁶ Nganga-Nzambi tubaka, “Muntu yina kele na nganda ya mabanza ya yandi. Beno tala na babuku mpe beno tala kana yandi kele mambele ya dibuundu ya beto. Ya kieleka yandi ke vwalangisa beto na nzila ya malongi ya yandi ya yimbi. Katula yandi na ntuala ya beto. Beto ke vwanda ve na mvwalangana na kati ya bantu.”

⁸⁷ Mbote, nge lunga yala na kati ya bantu mpe na nkembo na ntuala ya Nzambi; to sala nsodolo ya nge, samu, beno bambuka moyo, ntomo ya dibuundu ya kilumbu ke lunga ve na Ndinga ya Nzambi. Ya kele ve na bamvula bankama yivwa na makumi sambanu na yivwa ya Yawu. Ya kele ntomo mingi, Ndinga mosi, Nzambi mosi. Ya kele kaka yina.

⁸⁸ Na kutubaka ti Bawanzio vwandaka yimba ya ntete ve samu na bawu, mpe vwandaka tuba dyaka ti bawu “kuzwaka Nsangu ya Wanzio.” Wanzio mosi monikaka na bawu, pesaka bawu Nsangu, mpe bawu kwendaka mpe talaka ti Nsangu yango vwandaka Kieleka. Mpe kutuba, “Na lweka yankaka ya yawu, Wanzio kuyimbaka nowele ya ntete ve samu na beto.”

⁸⁹ “Beno lenda banza?” Bawu ke tuba, “Muntu ya mputu yina.” Ata mbala mosi ve ti bawu kuzwaka kima mutindu yina kusalama na kati ya bawu, beno zaba, samu ti ya vwandaka malongi ya ngitukulu samu na bawu. Mpe kikuma yawu yina

bawu lendaka mona Yawu ve na kati ya Masonuku, yawu vwandaka ve samu na bawu na kumona Yawu. Ya ngitukulu samu na bantu ya ndwenga, ata nzingulu ya mutindu yina me salamaka na bawu. Yina ba lendaka kwikila ve, kasi Yawu vwandaka kaka Kieleka. Ya kele Kieleka, beto zaba ti Yawu kele Kieleka. Beno banza! Bandimi ya Klisto ya ntete mpe dibuundu ya ntete vwandaka mivungi ya mameme, banganga-Nzambi ve; mivungi ya mameme, mivungi. Samu na yinki mivungi?

⁹⁰ Beno tala! Ke sepela mpe ke kembisa Nzambi samu na yina bawu kumonaka mpe me kuwa, kuwaka Bawanzio kuyimba samu na ntangu ya bawu ya ntete na muntu. Bawanzio yimbaka ntete ve na muntu. Mpe beno tala ba-chorale, wapi mutindu bawu telemaka mpe longukaka mpe longukaka bandinga yina, “bawu vwandaka yimba na mbutukulu ya Mesiya,” mpe bawu vwandaka luta na lweka yankaka! Mpe Bawanzio kulumukaka mpe yimbaka na mivungi ya mameme ya mumesanu, na bilele ya banganga-Nzambi ve, kasi na bilele ya mivungi. Mpe beno tala yina me kuzwa Nsangu ya ntete, ya kele ya kulutula nene.

⁹¹ Mpe kisika ba pesaka yawu, ve na kati ya ba-cathedrale, kasi na ntoto ya kuyuma, kuna na ntoto ya kuyuma kisika Wanzio ya Mfumu kwisaka. Na yinzo-Nzambi ve, na ntoto ya kuyuma. Ba zolaka ve nkwizulu ya Yandi na kati ya dibuundu. Bawu banzaka ti Yandi vwandaka, mpe bawu banzaka ti bawu vwandaka na Yawu, kasi Nzambi siamisaka ti yawu vwandaka luvunu. “Yandi kele na lenda ya matadi yayi kubasisa bana ya Abraham.” Ya kele kieleka.

⁹² Bawanzio ya ntete vwandaka kuyimba na mukembu, ya vwandaka na Zulu. Kana beno tala na Job 38:7, (mutindu mu ke mona ndambu ya beno kubaka banoti), ntangu dikani ya Nzambi ya ntete yina vwandaka sala luvangulu ya Yandi ya ntete, ntoto. Job vwandaka muntu ya nene, ya mayele mingi, mpe yandi vwandaka na mitindu nionso ya ndwenga. Yandi tubaka, “Ntangu mu ke kwendaka na zando, bantinu ya bantwenia, bawu nionso ke fukamaka na ntwala ya munu, mpe ke zola kaka mwa ntangu fioti ya ndwenga ya munu.” Mpe yandi vwanza bakula ve samu na yinki yandi zolaka vwanza na mutindu ti yandi vwandaka.

⁹³ Mpe na yawu Nzambi yufulaka yandi, yandi tubaka, “Nge zola kutelama mutindu muntu, samu ti mu ke kulumuka na kuzonza na nge.” Mpe na ntangu Nzambi kulumukaka na kati ya kitebo, Yandi tubaka, “Job, wapi nge vwandaka na ntwala mu vwandaka tula fondasio ya ntoto? Ntangu bambwetete ya suka vwandaka yimbila kintwadi, mpe bana ya Nzambi vwandaka boka na kiese, kuna wapi sika nge vwandaka, Job?” Mpe yandi vwandaka ya kubeba na ntangu yina. “Wapi sika nge vwandaka?”

⁹⁴ Beno me mona, Bawanzio ya ntete vwandaka kuyimba na mukembu, vwandaka na Zulu. Kasi mbala ya ntete bawu vwandaka kuyimba na ntoto, ya vwandaka mivungi na mbutukulu ya Nzambi, Emmanuel na zulu ya ntoto; bantu ya ntete yina me kuwaka ntete ve Wanzio ke yimbila, ya vwandaka mivungi ya kukikulumusa.

⁹⁵ Ntangu beto ke baka bakento ya beto yina me pakula na kizizi, yina ke na bansuki ya kuzenga, yina ke lwataka bakupe, mpe ke ningisa mutindu mosi ya dizwela ya dibuundu pene-pene ya bawu, mpe kutelama mpe kuyimba mutindu kima mosi, mpe na yina beto ke banza ti Nzambi fwana kuwa yawu? Yandi ke na Bawanzio kuna yina lenda kuyamba Yandi kubanda . . . ntete Yandi kuma muntu. Uh-huh. Beno basika mpe beno zinga . . . mpe beno lwata bilele yina kele busafu na Nzambi, mpe wapi mutindu beno lenda banza ti ya kele ya Nzambi? Beno ke tuba, “Mbote, mu kele ya . . .”

⁹⁶ “Wapi kisika nge vwandaka ntangu mu vwandaka sala ntoto? Tuba na Munu wapi kisika mu vwandaka sungika yawu. Wapi sika yawu ke baluka? Wapi sika nge vwandaka?” Beno ke banza ti Nzambi fwana yufula beto mwa ndwenga ya beto. Ndwenga ya beto kele kaka bulawu samu na Yandi. Yandi ke sala yina Yandi ke tuba ti Yandi ke sala.

⁹⁷ Ntangu yayi beno tala, Nzambi ke na kuyidika luvangulu yankaka. Yandi ke vangaka ntoto, luzingu yina ke kufwa. Bawanzio ke yimba na Mazulu. Kasi awa Yandi ke vangaka Luzingu ya malu-malu, Luzingu ya Kukonda nsuka samu na muntu, mpe Yandi ke na kuyimba na bantu ya Yandi na nzila ya Bawanzio; na zulu ya ntoto, ve na Mazulu. Mazulu kele na Luzingu ya Kukonda nsuka. Beno me mona? Mpe Yandi yimbaka . . . bawu yimbaka na Mazulu, ntangu luvangulu ya lufwa ke kota; mpe awa luvangulu yina ke kufwaka ve ke na kwiza, mpe ntangu yayi ba ke na kuyimba na bantu ya ntoto. Mbala ya ntete, na mivungi. Ya ke ya kubwa, mutindu yina ve?

⁹⁸ Yandi bandaka luvangulu ya malu-malu. Yinki ya vwandaka? Luvangulu ya Yandi mosi. Nzambi kumaka nsuni mpe zingaka na kati-kati ya beto. Ya kele . . . Biblia ke tuba, “Na mbandukulu ya ngidikulu ya Nzambi.” Nzambi vangaka na mutindu ya kimuntu; na kati ya Yesu Klisto, Mwana ya Yandi, Nzambi zingaka. Yandi tungaka tabernacle ya Yandi ya nsuni mpe mikwa, mpe zingaka na tabernacle yango; Nzambi, *Emmanuel*, “Nzambi na beto.” Yandi tungaka Yandi mosi yinzo, samu na kuzinga na kati ya yawu, samu ti Yandi lenda lakisa Ndinga ya Yandi na bantu ya Yandi na nzila ya yina. Beno zaba yina Nzambi kele, ntangu beno ke mona Klisto.

⁹⁹ Beno bambuka moyo, ya ke vwandaka kaka na kuyimba na mbutukulu ya ntinu. Bantu yikwa zaba yawu? Ya kieleka, beno zabaka yawu. Mbote, ntangu yayi, beno banza kana Ntinu

yayi zolaka butuka kuna, kento mosi zolaka kwisa mbangu na cathédrale kisika mosi kuna, mpe kutuba, “Beno kukubika mbeto mbala mosi, mpe beno nata badokotolo, samu ti mu ke nata Emmanuel na ntoto”? Kento mosi ya mputu ya Nazareth, mbanza ya kulutila yisi, ya yimbi mingi kulutila Tucson to nionso yankaka ya bawu, mpe kasi ntwenya yayi ya kento me kwisa kuna na nganga-nzambi ya mbuta mpe tubaka, “Mu—mu ke na kukubamaka samu na kubuta Emmanuel.” Ba ke losa yandi na boloko. Kieleka ba ke sala yawu. Kieleka ba ke sala yawu. Ya kinzambi-nzambi ya mutindu yina samu na kunata na kati ya bantu ya yandi, yandi zolaka ve kutelama samu na yawu. To yandi ke sala yawu ve bubu yayi. Kasi kaka mutindu mosi ya ke na kusalamaka, kaka mutindu mosi.

¹⁰⁰ Beno tala, ya fwana vwanda kuyimba. Bantinu vwandaka . . . Yandi vwandaka yimba ve. Bantu vwandaka yimbila Yandi ve, samu bawu vwandaka kwikila na Yandi ve. Mpe ya kele samu na yina . . . Awa Yawu me kwisa, beno lenda beluka na kuzwa Yawu. Kikuma yawu yina bubu yayi bantu ke na nsoni ya kukumisa Nzambi, bawu ke na nsoni ya Klisto! Ba-cathédrale ya nene ke yamba ve mbotika ya Mpeve-Santu, ba kele ya kuvwanda mutindu mosi na mutindu ya bawu ya dibuundu ti bawu ke yamba Yawu ve. Nzambi ke kuzwa muntu yina Yandi lenda kubaka lukumu. “Yandi kele na kiyeka ya kubasisa bana samu na Abraham,” mutindu mu ke tanga diaka Jean.

¹⁰¹ Beno tala, bantu ya Yandi fwana kuyimba na Yandi. Mpe bantu ya Yandi vwandaka Bawanzio ya Yandi, mpe bawu vwandaka yimba na mivungi ya Yandi yina vwandaka baka Nsangu ya Yandi.

¹⁰² Nani ke kuwa Yawu ntete? Ya kieleka, bantu ya Yandi. Ya kele yina ke kuwa Ntinu kuyimba ntete, ke vwanda bantu ya Yandi. Mpe yinki vwandaka bantu ya Yandi? Ya vwandaka bula fioti, mutindu yina ve, bampangi? Ya vwandaka banganga-Nzambi ya Yandi ve. Ya vwandaka ve ba-théologien. Ya kieleka. Ya vwandaka ve bantu ya denomination. Ve, ya vwandaka mivungi. Samu na yinki? Ya vwandaka na dimeme yina me butuka, ya kele samu na yina. Beno me mona? Bantu ya Yandi kuwaka Yawu, yina Nzambi zabaka ke kwikila. Nzambi fidisaka Nsangu ya Yandi na bayina ke kwikila Yawu. Yandi kele ndwenga nionso; Yandi zaba kisika ya kutinda Nsangu ya Yandi, yina ke kwikila Yawu. Mazulu ya kulutila Mazulu me fidisa na muntu ya yisi mingi na zulu ya ntoto.

¹⁰³ Yesu tubaka, na Matthieu 5, “Kyese na mpeve ya mawa, samu ti Kimfumu ya Mazulu kele ya bawu.” Marie, na . . . Kana beno ke na kusonika Masonuku, ya kele Matthieu 5. Mpe kana beno ke na kusonika Masonuku . . . Yawu yina mu me sonika awa, kele Masonuku.

¹⁰⁴ Marie tubaka, na Luc 1:52, ntangu yandi vwandaka ya kupakulama na Mpeve, Mpeve-Santu na zulu ya yandi, yandi tubaka, “Yandi me zangula bawu na kitezo ya yisi.” Marie tubaka yawu, mama ya Yesu, yandi tubaka, “Yandi me zanguka na ba-diplome yina.”

¹⁰⁵ Luc mpe tubaka, “Bantu ya mutindu nyonso kuwaka Yandi na kyese mingi.” Ve mayela, ba-théologien, milongisi ya musiku mpe ya théologie; kasi bantu ya mumesanu kuwaka Yandi na kiese, bantu ya kitezo ya yisi.

¹⁰⁶ Na kati ya Masonuku nionso ya santu, Nsangu ya mpulusu me pesama na mivungi mpe na nzila ya mameme.

¹⁰⁷ Ntangu yayi mu fwana sukisa, samu ti beto ke na kubelama na ntangu ya kusukisa. Mu ke na kubikaka Masonuku mingi kaka samu mu nata beno na dibanza yayi.

¹⁰⁸ Na mutindu nionso ya Masonuku, mpulusu me talisama na nzila ya mivungi mpe mameme. Ya kele kieleka. Beto nyonso me wisana na yawu. Samu na yinki? Ya vwandaka na kivudi mpe kifwanukusu. Mpe nionso yina . . . Kana mu me monaka ntete ve diboko ya munu, mpe mu talaka na nsi awa na kivudi ya diboko ya munu, mpe mu monaka ti mu vwandaka na misapi tanu, Mu zolaka zaba ti ya vwandaka kutalisama; negatif vwandaka talisa positif. Mpe ya kele samu na yina Nsangu ke kwizaka ntangu nyonso na . . . mpulusu na nzila ya mameme, samu na kubanda mbandukulu ya kieleka . . . Mpe ya vwandaka na nzila ya mameme, mpe na nzila ya mivungi, ti Yandi me kukimonikisa Yandi mosi. Nionso vwandaka bivudi mpe bifwanisu.

¹⁰⁹ Ntangu yayi beto tala na mbandukulu. Adam na Eve, yina vwandaka kuna na ntwala ya Nzambi samu na kuwa Nsangu ya Yandi na bawu, ba vwandaka kanga ba-rein ya bawu mpusu ya mameme. Nsangu ya ntete yina me wakanaka ntete ve, pesamaka na zulu ya mpusu ya dimeme ya kufwa, ti Nzambi kufwaka mpe fikaka Adam na Eve na kati ya yawu. Na manima ba mekaka na kusala nsambulu ya bawu mosi ya matiti ya fiki, ya ke simba ve. Munkayulu ya mameme ba tumaka yawu samu na kukatula-masumu kubanda mbandukulu, munkayulu ya mameme.

¹¹⁰ Ntangu yayi, beto ke sukisa yayi ntangu yayi, mpe kutalisa na beno samu na yinki ya zolaka vwanda mivungi; mpe samu na yinki ya zolaka vwanda, Yandi zolaka vwanda dimeme.

¹¹¹ Ntangu yayi, baprofete ya Ngwisani ya Ntama vwandaka kulwata bampusu ya mameme (beto zaba yawu, uh-huh), samu na kutalisa lukwikilu ya bawu na Ndinga ya Yandi yina ke kwisa ya kulunga Mwana-dimeme. Yawu yina baprofete.

¹¹² Ntangu yayi, Ndinga ya Nzambi ke kwisaka ve na théologien, kele ve . . . yandi—yandi kele kaka mvindu yina ke fika Yawu. Ya kele kieleka. Ya kele ve na kima mutindu yina na kutuba . . . Beno ke tuba, “Mbote, muntu yayi kele muntu ya théologie.” Yina ke tula yandi ntama mingi na Ndinga kulutula kima yina

mu zaba. Beno me mona? Ndinga ya Mfumu Nzambi, Nzambi ya moyo, me sobaka ata fioti ve. Konso kisika yina na kati ya Biblia, Ndinga ya Nzambi ke kwisaka na ba profete ntangu nionso. Na ba théologien ve to badokotolo, na baprofete! Mpe bawu ntangu nyonso, konso ntangu, vwandaka manga mpe vwandaka manga.

¹¹³ Baprofete vwandaka diaka ntangu nionso mivungi. Baprofete vwandaka sala bawu mosi na mpusu ya bawu, samu bawu vwandaka lwata mpusu ya mameme yina bawu vwandaka tala. Mpe nsangu ya ntete, samu na nsungi yina ba me fundisa, vwandaka na zulu ya bampusu ya mameme. Baprofete, mu ke tuba diaka, bawu vwandaka kulwata bampusu ya mameme, samu ti bawu vwandaka pesa kimbangi na yawu, ti bawu vwandaka kwikila ti ya vwandaka ke kwiza Mwana-dimeme ya kulunga samu na munkayulu yina. Mpe Ndinga ya Nzambi kwizaka na bawu na zulu ya mpusu ya dimeme. Misadi ya yandi yayi. . . to ba profete yayi vwandaka mivungi ya yandi. Abraham vwandaka muvungi. Isaac vwandaka muvungi. Jacob vwandaka muvungi. Moise vwandaka muvungi. David vwandaka muvungi. Bitalisi nionso ya Nzambi vwandaka ntangu nionso mivungi.

¹¹⁴ Ntangu yayi beto ke mona samu na yinki yandi kwisaka na mivungi. Ba zabaka ti mameme kele kukondwa lusalusu samu na kutwadisa bawu. Ba. . . mameme kele kukondwa ya kulunga, yandi lenda ve kukwenda na yandi mosi. Kikuma yawu yina Nzambi ke fwanikisa bana ya Yandi yina ke kwikilaka na mameme. Bawu lenda twadisama. Kasi beno tala mbote yina ke twadisa beno! Beno kuzwa nkombo ve, yandi ke nata beno na kisika ya lufwa. Nzambi pesaka beto nkombo ata fioti ve, Yandi pesaka beto Mwana ya Yandi (Mpeve-Santu) samu na kutwadisa beto. Yandi kele Ntwadisi ya beto, muvungi yina muntu me sala ve, kasi Nzambi me pesa yandi bamivungi na zulu ya bana ya mameme.

¹¹⁵ Ntangu yayi, beno ke baka ngulu, mpe beno ke tuba na ngulu yayi, “Mu ke kumisa nge mwana-dimeme.” Mpe beno ke sukula yandi. Mpe beno ke pakula yandi na manzaka ya yandi, mpe—mpe nionso yina. Mpe ke pesa yandi madya mutindu dimeme, kukotisa yandi na mutindu mosi ya kudya. Mpe mu tulaka yandi na ntoto to kuna na. . . sika wapi mameme, ya kilanga to kima mosi. Mpe kana ya kele na dibulu ya poto-poto kisika, ti ngulu ke kwenda kaka mbala mosi na dibulu yina ya poto-poto. Beno me mona? Samu na yinki? Ya kele samu ti nkadulu ya yandi kele dyaka ngulu.

¹¹⁶ Mpe kikuma yawu yina bakwikidi ya dibuundu, bubu yayi, yina ke salama na bima ya yinza, beno me mona, ya kele samu ti nkadulu ya bawu me soba ve. Bawu ke kudya mutindu nyonso ya dibuundu, ya théologie ya bima ya mvindu, kasi Ndinga ya Nzambi bawu lenda ve kundima Yawu. Bawu ke kota mpe ke kuwa Ndinga. . .

117 Beno zaba, muntu ya luvunu ya kulutila nene na yinza, kele ngoyi-ngoyi ya ntama. Na Biblia, ya vwandaka na zole yina vwandaka basika na nzasa. Ngoyi-ngoyi yango me basika mpe yandi me vutuka ata mbala mosi ve, samu ti yandi kele kokombele, muntu ya kulawuka. Yandi tulaka na banzutu ya bantu ya kufwa mpe fulusaka kivumu ya yandi na niama ya kufwa. Kasi na ntangu yandi balukaka yembe, yembe lungaka telema ve, na yina yandi vutukaka na yinzo ya Tata mpe Noé, mpe bulaka na kielo tii kuna Noé bikaka yandi.

118 Ntangu yayi, ngoyi-ngoyi lenda vwanda awa mpe kudia mpunda ya kufwa, kilumbu nionso, mpe kupumbuka kuna na kilanga mpe kudia mbuma na yembe. Kasi yembe lunga pumbuka ve kuna mpe kudia mpunda ya kufwa, na manima kudia mbuma; yawu ke fwa yandi. Beno me mona, yembe kele na ndulangandu ve, mpe yandi lenda basisa yawu ve.

119 Mpe na ntangu yembe nionso ya Nzambi, konso yembe yina ke kudia yembe to dimeme, niama ya mvindu, ntangu beno ke kwenda samu na kupesa bawu bima ya yinza, ba zaba Mulongi ya bawu tubaka, “Yandi yina ke zolaka yinza to bima ya yinza, zola ya Nzambi kele ve na kati ya yandi.” Nge me pesa yandi kima ya kuswaswana na Ndinga ya Nzambi, yandi lenda ve kukanga yawu. Kasi diabulu lenda baka Yawu mpe yinza mpe, mpe kubokila yawu nionso ya Nzambi. Beno lenda ve kuvukisa mafuta mpe kumwangisa masa, ya ke vukana ve.

120 Bawu, mivungi nionso yayi, bawu zabaka ti mameme vwandaka kukondwa lusalusu kukondwa mivungi. Mpe bawu vwandaka mivungi, mpe zabaka ti yandi lendaka vwanda ya kutwadisa.

121 Kukabula mawa kele kumona, bubu yayi, ti bawu ke meka na kudisa mameme, madia ya mvindu. Kasi dimeme ke kudia yawu ve. Ve, tata! Beno me mona, bawu vwandaka meka na kudisa mameme, kuna, madia ya mvindu. Mpe ntangu Ndinga kwisaka, bawu vwandaka sadila mingi madia ya mvindu, bawu zabaka Ndinga ve. Mpe yawu yina bubu yayi, na ntangu kima yina mosi me siamisama mpe me talisa ti Nzambi ke sala kima yayi. Na yina ba vwandaka sadila madia ya mvindu, mpe vwandaka kudia ya madia ya mvindu, tii beno . . . mbote, ya kele ve na kuzonza na bawu, ba ke kuwa kaka Yawu ve, kaka yina. Yimbwa . . . Biblia ke tuba, “Mutindu yimbwa ke vutuka na yina yandi me luka, mpe ngulu na poto-poto ya yawu, mutindu mosi na bawu.”

122 Beno kuwa Ndinga, mpe beno vutuka na poto-poto ya ntama! Mpe beno ke tuba, “Ah, Ya kele bufanatiki. Beno kwikila ve kima mutindu yina.”

123 Nzambi . . . mameme ke salaka mutindu mosi bubu yayi, ba fwana tula kivuvu na madia ya Ndinga. Ba ke baka madia yankaka ve. Beno lenda ve kupesa bawu madya ya dibuundu,

mameme ya kieleka. Ve! Ve! Beno kwenda tuba na bawu, “Ntangu yayi beno tala, beto nyonso ke vwanda kintwadi. Ntangu yayi, Yesu sambilaka ti beto nyonso lenda vwanda ‘mosi.’” Beno me kuwa kaka kima mutindu mosi na Tucson ntama mingi ve, mwa bilumbu me luta, kasi ya kele luvunu! Yesu sambilaka ata fioti ve. . . Yinki mutindu Yandi. . . Yinki mutindu beno lunga sala ti Ndinga ke bwisa Yawu mosi, na manima ya Yawu mosi? Na yina Nzambi kele dyaka ve kulutila muntu nyonso yankaka.

¹²⁴ Yesu tubaka, “Wapi mutindu bantu zole lenda kutambula kintwadi kana ti bawu kuwisana ve?” Wapi mutindu beno ke baka Methodiste, Baptiste, Presbyterien, mpe Catholique, mpe beno tula yawu nionso kintwadi mpe beno vwanda mosi? Beno lenda vwanda mosi na nsi ya yintu ya muntu, kasi Yesu tubaka, “Ti bawu lenda vwanda mosi mutindu—mutindu munu mpe *Nge* kele mosi.” Ntangu yayi, Yandi zola ti beto nionso kuvwanda mosi na kati ya Yandi yina kele Ndinga! Amen! Ya kele, “Mosi na Tata.” Mpe Tata kele Mwana, kele mutindu mosi. Mpe ya kele Ndinga mosi, Ndinga me monisama, ke talisa Yawu mosi na kilumbu yayi mutindu Yawu salaka na kilumbu yina, samu beno vwanda mosi.

¹²⁵ Beno tala, Yandi tubaka, “Mutindu Tata fidisaka Munu, na yawu Mu ke tinda beno.” Tata yina fidisaka Yandi, me kota na Yandi samu na kusiamisa Ndinga. Mpe Yesu mosi yina ke tindaka bantu ya Yandi, ke kwendaka na kati ya bantu yina Yandi ke tindaka; mpe ke tuba, “Beno mpe ke sala bisalu yina mu ke sala, beno ke sala yawu.” Ya kieleka, Yandi sambilaka ti beto lenda vwanda mosi; mosi na Yandi, ata mosi ve na organisation mosi ve. Mosi ve na systeme mosi, kasi mosi na Nzambi. Samu ti Nzambi na kati ya Ndinga ya Yandi kele Mosi, mpe Yesu mpe Nzambi vwandaka Mosi, mpe beno mpe munu mpe Ndinga fwana vwanda mosi. Ya kieleka. Beto fwana vwanda mosi na ngwisani na Ndinga. Ve yina muntu yankaka ke tuba, yayi kele ntendulu ya muntu yandi mosi ve. Baka Yawu, yina Yawu ke tuba, mpe ke kwikila Yawu; mpe Nzambi ke siamisa Yawu, mpe ke siamisa ti Yawu kele kieleka. Beno banza ti Yawu kele kaka samu na bilandi, samu na kubaka Ndinga ya Yandi, samu na yawu mbala mosi mpe samu na kumona yawu. Beno ke mona ti ya ke sala samu na beno kaka mutindu Yandi silaka. Yinga, tata!

¹²⁶ Ba ke kudia ve bitini ya mvindu, ba ke vwanda na madia ya mameme. Santu Jean 10 ke tuba yawu, “Mameme ya Munu kuzaba Ndinga ya Munu.” Mpe kana Yandi kele Ndinga, na yawu yinki mutindu Ndinga ke sala Yandi? “Mameme ya Munu kuzaba Ndinga ya Munu, banzenza bawu ke landa ve.” Beno me mona? Yesu tubaka, “Ndinga ya ngitukulu yina bawu lunga landa ve.” Na yawu, mameme ya Yandi ke landa ve ndinga ya nzenza. Bawu ke landa bawu ve.

¹²⁷ Ba profete, mivungi, mpe mameme, bawu nionso ke pesa kimbangi ya nkwezulu.

¹²⁸ Ntangu yayi beno tala Nzambi yina ke sobaka ve na manaka ya Yandi ya Ndinga ya Yandi bubu yayi. Ntangu yayi beno banza kaka na mwa ntangu fioti: Ndinga yina ke sobaka ve.

¹²⁹ Beno tala ntangu yayi! Kana—kana Moise lendaka kwisa na nsangu ya Noé, yawu zolaka simba ve. Kana Jean-Baptiste lendaka kwisa na nsangu ya Moise ya ke sala ve. Kana Yesu zolaka kwisa na nsangu ya Moise to na nsangu ya Noé, ya zolaka simba ve. Mpe Wesley kukwisa na nsangu ya Luther, ya zolaka simba ve. Kana Pentecote kwisaka na nsangu ya Wesley, yawu lendaka sala ve; beto waka kaka kimbangi yina. Ntangu yayi, Nzambi ke landila kaka na kukwenda na ntuala. Beno tala kaka Ndinga, beno ke mona kisika beto kele.

¹³⁰ Na yina samu na yinki luzabusu ya ntete ya mivungi. . . Kana baprofete yayi nionso, bantu yayi nionso ya nene vwandaka mivungi, na yina samu na yinki Nzambi (Yandi yina ke sobaka ve) sobaka mutindu ya Yandi ya kusala awa, mpe kunata Yawu na ba théologien? Ya vwandaka mivungi. Mwana-dimeme ya kulunga, dikabu ya disumu, lendaka kwisa na mivungi.

¹³¹ Muvungi kuzaba mameme ya yandi kulutila yina yankaka. Muntu mosi ve kuzaba dimeme mutindu muvungi, yandi me longukaka yawu. Diaka zabaka wapi mutindu ya madia bawu vwandaka kudia. Bawu. . . yandi zabaka yina mameme ke kudia, mpe yandi zaba dimeme ya yandi na nzila ya yina bawu ke kudia. Beno ke mona dimeme ke kwenda kuna na lupangu ya madia ya mvindu samu na kudia madia ya mvindu, beno ke tuba, “Beni katula ngoyi-ngoyi yina kuna.” Beni me mona? Na yawu Nzambi zabaka kisika ya kutinda bawu.

¹³² Ntangu yayi beto bokila mosi ya mivungi-baprofete ya Yehowa ya nene, samu na kusiamisa ti Nzambi vwandaka na kati ya baprofete yayi ya mpusu. Beno tala mbote ntangu yayi. Beto ke bokila, ntete, Moise. Beto tala yandi. Ministere ya Yandi ke talisa na beto Yehowa na kati ya muvungi-profete ya Yandi. Ntangu yayi, beto ke baka yina mu banza, kana beto ke na ntangu, samu na bamuniti kumi na tanu ke landa. Beto ke baka zole ya yawu, kasi mu banza ti yandi yayi ke vwanza mbote.

¹³³ Moise; Yehowa ke talisa Yandi mosi awa, na muvungi-profete yayi. Yandi pesaka makabu tatu samu na kusiamisa ministere ya yandi mpe bokilaka bakuluntu ya Israel, mpe Pharaon. Beno tala muvungi-profete yayi, ntangu yayi. Yandi ke pesaka, ntangu nionso, baprofete ya Yandi, kidimbu ya kimpeve, samu na kusiamisa ti ya vwandaka Nzambi na kati ya bawu; samu ti ya lenda vwanza ve na mvwandulu ya Nzambi kukondwa bima ya kimpeve kusalama. Ata mbala mosi ve ti Yehowa me monana kukondwa kimpeve na kulandaka Yandi. Ya fwana vwanza. Na yina Yandi ke siamisaka ntangu nionso Yandi vwanza na

baprofete yayi, na nzila ya kusiamisaka yina ba vwandaka pesa profesi, kana ya vwandaka landila Ndinga ya Yandi.

¹³⁴ Ntangu yayi, kidimbu ya ntete Yandi pesaka na . . . profete-muvungi yayi (beno tala), yandi tulaka nkawa ya yandi na nioka.

¹³⁵ Ya zole, diboko ya yandi kitukaka lèpre.

¹³⁶ Tatu, samu na kubasisa maza na Nzadi ya Nile na Égypte, mpe kubalula yawu na menga.

¹³⁷ Ntangu yayi, Yandi pesaka yandi bidimbu tatu samu na kusiamisa na Égypte, mpe diaka na Israel, ti yandi vwandaka Ndinga ya Nzambi yina me tubama.

¹³⁸ Ntangu yayi, beno bambuka moyo, Moise bokilaka na luvangulu! Ya kele kieleka. Yandi me baka zyelo mpe me losa yawu na zulu, mpe me tuba, “Bika ti banzinzi kukwisa,” mpe banzinzi kwisaka. Yandi tubaka, “Bika ti banzinzi kukwisa,” mpe banzinzi kwisaka. “Bika ti makototo kukwisa,” mpe makototo kwisaka. Yandi kotisaka yawu na luvangulu! Ntangu yayi, muntu lenda kuyidika ve, kasi ya vwandaka ve muntu na kubanda. Ya vwandaka Yehowa na kati ya profete-muvungi ya Yandi! Amen!

¹³⁹ Beno tala mbote! Kidimbu ya tatu yina Yandi pesaka yandi vwandaka ve ya kulunga samu na kukwelana ya yandi, to yawu vwandaka ya kulunga na bumuntu ya yandi; kidimbu ya yandi ya tatu. Beno tala, bidimbu ya ntete zole ya kusonika na yandi, yandi mosi mpe kuzaba ya yandi. Mpe bawu vwandaka bidimbu zole yina Biblia ke tuba ti “bawu vwandaka na ndinga.” Kidimbu yankaka vwandaka na ndinga ve. Kasi bidimbu zole yina pesamaka na muntu na yandi, mpe na bantu na yandi, vwandaka na bandinga. Kasi kidimbu ya tatu, ntangu yayi beno tala, ba pesaka yawu . . . kidimbu, kidimbu ya tatu, vwandaka kidimbu ya lufwa: masa vwandaka baluka na menga. Kana menga ya beno—kana menga ya beno—ya beno lendaka soba na masa, na yina beno ke kufwa. Mpe kisika ya vwandaka na menga, menga yina basikaka, kele kidimbu ya lufwa; na yawu ya vwandaka samu na Pharaon. Ya tatu vwandaka kusoba masa ya Nile na menga, vwandaka samu na kutalisa—samu na kutalisa Nsangu ya yandi na Pharaon ti Nzambi ya beto kele Nzambi na zulu ya Nile, na zulu ya nzambi ya Nile. Yandi kele Nzambi na zulu ya nionso, mpe Yandi ke nata lufwa na yinsi yina. Mpe yawu yina vwandaka kidimbu ya menga. Oh, la la! Kidimbu ya lufwa: menga!

¹⁴⁰ Kasi zole yankaka vwandaka na bandinga ya profesi. (Mu—mu—mu banza ti beno ke tanga ntangu yayi, na kati-kati ya banzila, yina mu ke tuba.) Kasi bidimbu zole yina vwandaka na bandinga ya profesi samu na Israel samu na bilumbu ya bawu ke kwisa. (Ntangu yayi samu na beno yina vwandaka kuna na zulu ya mongo ntama mingi ve, ntangu ditadi kulosamaka na zulu.)

¹⁴¹ Ntangu yayi, mpe ke . . .yandi zolaka soba nkadulu, samu na kusala yawu kusala samu na bawu. Beno tala mbote dikunzi, beno tala mbote nyoka, beno tala mbote Mubu ya Mbwaki, mpe nyonso yina Yandi salaka, ntangu yayi. Beno tala muvungi ya mameme yina ke na kusala nzila samu na bawu na kukwenda. Kitini yina vwandaka na diboko ya muvungi, yina me luta théologie mpe bima nionso yina banganga-Nzambi tubaka, mpe nkawa yina ya muvungi twadisaka bawu kuna na kati ya bima nionso yina lendaka salama ve (na muntu). Ntangu Pharaon mekaka na kubanza ti “ba-cataractes basikaka na myongo mpe losaka masa, na manima yawu kotisaka yawu na menga,” na yawu Nzambi kulumusaka tiya na zulu. Mpe Yandi nokaka mbote-mbote na zulu, mpe Yandi—mpe Yandi nokaka na zulu ya ntoto, mpe nionso yina.

¹⁴² Yinki Yandi salaka? Na nzila ya nkawa yina ya muvungi, buku ve, dibanza ya théologie ve, kasi nkawa ya muvungi! Beto ke kuma na yawu na minuti mosi; yinti ya muvungi, Yandi salaka yawu. Ya kele ve buku ya bisambu ya denomination, kasi yinti ya muvungi. Nkawa ya muvungi ke twadisaka mameme ya yandi, ke sala nzila pwelele na yina ba vwandaka kwenda na Ndinga ya nsilulu na kati ya yinsi. Wapi kima ya kitoko ya kele bubu yayi na Yinti ya Muvungi, bubu yayi, ke twadisa mameme ya Yandi na Yinsi ya Nsilulu; na kutulaka théologie mpe nionso yankaka ya yinza yayi, mpe bima ya yinza, mpe ba denomination, bima nionso; ke zibula nzila, mpe ke siamisa Ndinga ya Yandi ti ya kele Kieleka; Yinti ya Muvungi ke kwenda na ntwala.

¹⁴³ Mpe beno tala, yinti yayi ya muvungi ya mameme yina vwandaka twadisa mameme. . .Beno ke kwikila yawu? Ya kieleka yandi twadisaka dimeme, yandi vulusaka bawu na Égypte na yinti yina na diboko ya yandi. Beto lenda tuba mingi na zulu ya yawu. Kasi samu na kubula kisika ya ngudi, yandi twadisaka mameme mpe fidisaka lufundusu na zulu ya bayina losaka Yawu! Nkawa mosi yina kumaka lusakumunu samu na mosi, kumaka nsingulu samu na bayankaka. Bamas ya mutindu mosi (ya Noé ke na kulonga) yina vulusaka yandi, bedisaka yinza. Yinti mosi yina twadisaka Israel na yinsi ya nsilulu, bedisaka bayina mangaka na kulanda profete-muvungi. Ya kele kieleka, beno kuma nkawa ya lufundusu.

Yinza; beno tala mutindu Nzambi ke zonzaka na nkadulu ya Yandi. Kana beto vwandaka kaka na ntangu. Mu sonikaka noti mosi kuna: Nzambi ke zonzaka na nkadulu ya Yandi. Beto kele ve na ntangu ya kusiamisa yawu.

¹⁴⁴ Kasi na kusiamisaka na ntwala, na nzila ya nioka ya kisengo na zulu ya ntunga ya mameme (ti yandi zingaka nyoka yayi pene-pene, na ntoto ya kuyuma), yayi ke zonzila kieleka kukatula-masumu na kimbevo mpe disumu.

¹⁴⁵ Yinti yina yawu mosi kitukaka nioka na ntuala ya Pharaon, mpe Pharaon mosi mekaka na kutendula diambu na nzila ya banganga-nkisi. Mpe mutindu mosi Pharaon ya bilumbu yayi, mpe mikwikidi ya kati-kati, bamekudi ya nsuni ya Nsangu, kumeka na kumekula kima ya mutindu mosi kukondwa kuzaba kisika ya ke katukaka; mpe losaka Yawu na kati ya mwa kima ya denomination, ntangu Ya kele kaka na kimpwanza na yawu mutindu mupepe kele na kisika ya kukangama. Kieleka! Kasi beno meka na kumekula, samu na kuyidika mbote-mbote.

¹⁴⁶ Kasi, beno tala, nkawa yayi ya muvungi mosi kudiaka banioka yankaka yina. Wapi kisika vwandaka banioka yayi? Bawu vwandaka bankawa na ntoto, mpe ya vwandaka kaka na nkawa mosi. “Mazulu na ntoto ke luta,” tubaka Yesu, “kasi Ndinga ya Munu ke luta ve.” Ya ke tubila kukatula-masumu ya kieleka ke kwisa samu na disumu.

¹⁴⁷ Mpe, munkayulu ya Israel na bilumbu ke kwisa . . . mpe kuna kisika mu me tubila Israel, ntangu yayi na bilumbu ke kwisa . . . Kuna ba pesaka bawu luvukulu na kimpika ya lufwa na nzila ya profete-muvungi. Ba basisaka bawu na kimpika na profete-muvungi mosi na nkawa. Beno me mona? Ya vwandaka zonzila Mukudi ya Israël na ntuala, katuka lufwa mpe difelo, na nzila ya Muvungi-profete yina beto ke tubila.

¹⁴⁸ Ntangu yayi, samu na nionso yina . . . nionso yina beto me zaba Israel, me kuyamba ve Ndinga ya profete-muvungi, nionso ya Israël kuzwaka Yawu ve. Ntangu yayi, beno tala, ba vwandaka kuniunguta. “Oh,” ntangu yandi vwandaka sala bimangu, “yandi vwandaka muntu ya nene,” kasi ntangu ya kwisaka na Nsangu ya yandi, “yina vwandaka ya kuswaswana.” Bidimbu nionso ya nene ke landa nsangu ya malu-malu. Beto zaba yawu. Na ntoto ya kuyuma ba vwandaka pesa nkembo, na ntoto ya kuyuma, mpe kufwaka na mafunda. Ya kieleka, ya vwandaka kaka ve zole na kati ya bawu yina kotaka kuna vulukaka na kati ya mafuku zole mpe ndambu ya mafuku, zole na ndambu ya mafuku zole.

¹⁴⁹ Beno ke tuba, “Ti . . . Yinki kusalamaka na bawu?” Bawu kele ya Seko.

¹⁵⁰ “Bawu nionso, Mpangi Branham?” Yesu tubaka mutindu yina.

¹⁵¹ Bawu tubaka, “Batata ya beto kudiaka Mana na ntoto ya kuyuma, mpe bawu nwaka kuna na Ditadi.”

¹⁵² Mpe Yandi . . . Yesu tubaka, “Mpe bawu kele, mosi na mosi, kufwaka,” ya Seko ya kukabuka, beno me mona, mosi na mosi.

¹⁵³ Beno tala ba vwandaka sala kieleka na yina me tadila nzila yina Nzambi kubikaka, ya vwandaka samu na yina bawu kufwaka. (Ntangu yayi, beno kuwa mbote-mbote, beno kondwa ve mwa milabu yayi ya nsuka.) Bawu vwandaka pesa nkembo! Yina vwandaka sala bawu kufwa na ntoto ya kuyuma, bawu

vwandaka manga na yina me tala nzila yina Nzambi kubikaka: na nzila ya Nsangu mosi, profete, lutwadusu ya muntu mosi. Beno tuba na munu ntangu Nzambi sadilaka kimvuka mosi samu na kutwadisa. Beno ke mona yawu ve na kati ya Biblia. Muntu mosi, bawu . . . Ndinga kwisaka na Moise!

¹⁵⁴ Koré; beto nyonso zaba ti yandi—yandi kumaka yandi mosi kintwadi mpe kotisaka Nzambi ya kele ve, kusala kima mutindu yina, samu na kusala muntu mosi na Nsangu. Yandi tubaka, “Beto nionso kele ya santu. Samu na yinki beto lenda ve kuzwa denomination? Mpe samu na yinki beto lenda ve . . . kutula *yayi*, mpe kusala *yayi*, mpe kusala yina?”

¹⁵⁵ Nzambi tubaka na Moise, “Kabwana na yandi, ya me lunga Munu.” Mpe beno bambuka moyo, Jude ke zonza kima mosi, na bilumbu ya nsuka. Ya kele kieleka, “Ba me kufwa na kukatukilaka nzila ya Koré.” Beto zaba mpe yinki kusalamaka na Koré mpe—mpe kupema yina yufulaka Ndinga ya Nzambi mpe ndwenga ya Nzambi ya lutwadusu ya muntu yina: mosi na mosi ya bawu kufwaka.

¹⁵⁶ Ntangu yayi, beto ke tala Nzambi na muvungi-profete, na kulakisaka manaka ya Yandi ya ntuala na kidimbu yina ke landa. Ntangu yayi, beno tala mbote. Beto ke mona yawu *kuna*, ntangu yayi beto tala yawu mbote na kidimbu yina ke landa.

¹⁵⁷ Ntangu yayi, beno tala, ba fidisaka yandi na bampangi ya yandi na kimpika, na nsi ya kimpika, na Nsangu ya luvukulu, na kidimbu yina Nzambi me pesa samu na kusiamisa yina Yandi me tuba. Israel kwendaka na Nsangu ya yandi, bawu kwikilaka Yawu, mosi na mosi ya bawu, kasi na ntangu ya nkokila . . . Ba kwendaka samu na bimangu ya yandi, kasi na ntangu ya nkokila ntangu ba . . . yandi pesaka Nsangu ya yandi, “Ya vwandaka luswaswanu.” Bayina nionso kwikilaka ve Nsangu yina, kufwaka. Ya kieleka. Yinki vwandaka Nsangu? Nsangu vwandaka ya nkwezulu ya lufundusu. Na nkokila yayi, na ntangu ya nkokila, Nzambi kwendaka na lweka ya Israel samu na kumona kana bantu me kwikila Nsangu ya Yandi ya muvungi-profete; mpe bayina nionso kwikilaka Yawu ve, kufwaka.

¹⁵⁸ Ntangu yayi beno tala, beto ke nata yawu na Muvungi ya Nene na mwa ntangu fioti. Beno me mona? Beno tala ministere ya Nene ya Muvungi-Profete. Ya bimangu ya Yandi, konso dibuundu me zibuka mpe ke yamba Yandi. Bawu zolaka ti bambevo ya bawu kubeluka. Bawu zolaka sala bima ya nene. Kuzabana ya Yandi vwandaka nene. Kasi ntangu ya nkokila kwisaka, kilumbu mosi na manima Yandi balulaka masa na vinu, mpe yandi disaka mafunda, dimpa, mpe salaka bimangu, Yandi bandaka na kukulumuka mpe kusolula na bawu. Mpe Yandi tubaka na bawu, “Munu na Tata ya Munu kele mosi. Samu na yinki beno ke tuba, ‘Lakisa beto Tata?’”

159 “Oh, mpangi-bakala! Muntu yayi ke na kukikumisa mutindu mosi na Nzambi?” Yina vwandaka mingi samu na dibanza ya bawu ya dibuundu. Kasi ya vwandaka Kieleka, Yandi vwandaka! Beno me mona? Kasi ntangu bawu salaka yawu, bantu mingi vwandaka landa Yandi ve.

160 Na yina Yandi balukaka mpe tubaka, “Kana ti beno kudia ve Nzutu ya Mwana ya muntu, mpe kana beno kunwa ve Menga ya Yandi, beno ke kuzwa ve luzingu.”

161 Ntangu yayi, yinki beno ke banza muntu ya mayele, ya mayele yina lungaka banza? Mu ke banza banganga-Nzambi yina vwandaka na Yandi na tempelo vwandaka na nsoni mingi—vwandaka na nsoni ya—ya bawu kuna na ntwala ya Yandi. “Kubanza ti muntu mosi lunga telema mpe kutuba diambu ya mutindu yina, ‘Kana ve ti beno bantu kudia Nzutu ya Munu, mpe kunwa Menga ya Munu.’” Yandi tubaka, “Yayi kele muntu yina ke kunwaka menga ya bantu, beno me mona, ‘Kudia Nzutu ya Munu mpe kunwa . . .’ Na yina, yandi kele muntu ke kudiaka bantu. Beno bantu ya mabanza ya mbote ke banza . . . beno ke kwenda ntama na kilawu ya mutindu yina.”

162 Yandi tendulaka Yawu ata fioti ve, Yandi tubaka Yawu kaka! Yandi salaka yawu samu na kubula disakuba na bawu, samu na kusoola mameme ya Yandi na bankombo. Yandi salaka yawu samu na kukatula bawu. Na yina muntu mosi ve zolaka sala ngwisani na Yandi. Bawu vwandaka ve na ngwisani na yawu. Beno me mona?

163 Beno tala, na ntangu ya nkokila, Nzambi kwendaka kuna na kati ya capitole mpe monaka nani kwikilaka. Mpe Yandi salaka kima ya mutindu mosi na bilumbu ya Muvungi ya Nene. Beno tala ministere ya Nene ya Muvungi-Profete, kasi beno tala yayi, samu na bakwikidi ya Nsangu ya Yandi, kasi ve . . . Nsangu yayi ya nkokila, bawu vwandaka kwikila Yawu ve. Bawu vwandaka kwikila ve ti Yandi vwandaka Nzambi. Ba vwanda zola kusala Yandi muntu ya mbote. Ba vwanda zola kusala Yandi profete. Yandi vwandaka muntu ya mbote, mpe Yandi vwandaka Profete, kasi Yandi vwandaka kulutila yina. Ya kele malongi ya mutindu nyonso bubu yayi, ti “Yandi kele kaka muntu ya mbote, yandi vwandaka profete.” Yandi vwandaka kima ve ya kukondwa Emmanuel! Yandi vwandaka Nzambi yina monisamaka na kati ya Yesu Klisto Mwana ya Yandi, na kusalaka Yandi mpe Tata mosi. Kaka yina Yandi lendaka vwanda.

164 Zacharie 14:7, mu zola kutuba yayi, Bansemu ya nkokila mpe Nsangu dyaka na ntangu ya nsuka. Beno me bakula yawu? Bayina nionso landaka Moise, monaka Dikunzi ya Tiya yina talisaka yandi na Mongo ya Sinai. Yandi pesaka kimbangi, mpe zonzaka na Dikunzi ya Tiya yayi yina vwandaka na divunda mpe tubaka na yandi Nsangu yayi, mingi ya bawu lendaka kwikila Yawu ve. Kasi bantu mingi landaka yandi kuna na

Egypte (kubasika na yinza mpe zabukaka mubu ya kukabwana, mpe kwendaka na ntoto ya kuyuma), monaka Dikunzi ya Tiya mosi (yina yandi zonzaka) na kusiamisaka muvungi-profete yina na kuvwanda muvungi ya mameme. Bawu monaka Yawu, mpe mingi na kati ya bawu vwandaka kwikila Yawu ve na manima bawu monaka Yawu.

¹⁶⁵ Beno tala wapi mutindu, diaka, Nzambi yina ke sobaka ata fioti ve, Muvungi-Profete ya Nene, bakaka bayina bikanaka na Yandi mpe na ministere ya Yandi na Mongo Olive; Muvungi-Profete ya Nene, Mosi beto ke tubila, Yesu. [Kisika ya mpamba na bande—Mu.] . . .? . . . mpe kuwaka Tata (Dikunzi mosi ya Tiya) kusiamisa Yandi, ti Moise me siamisama.

¹⁶⁶ Nzambi mosi yina Moise tubaka, kwisaka kuna na Moise mpe lakisaka Dikunzi ya Tiya ti Yandi vwandaka Jéhovah yina vwandaka twadisa Moise. Nzambi vwandaka na kati ya muvungi-profete ya Yandi.

¹⁶⁷ Awa Yandi ke baka Muvungi-Profete yankaka, Profete ya Nene, Dimeme ya Kieleka, Yesu, mpe ke sala nsodolo ya muntu tatu, mpe ke nata bawu na zulu ya Mongo ya Olive, mpe kuna me siamisama Yesu. Mpe Yandi tungaka Yandi mosi mpe bantu yankaka nionso, yandi tubaka, “Yayi kele Mwana ya Munu ya luzolo, beno kuwa Yandi!” Mpe ntangu bawu talaka na zulu, bawu monaka muntu mosi ve kuvulusa Yesu kaka. Ya kele kieleka. Yandi vwandaka Yandi yina. Ntangu yayi, yina ke sukisa dyambu, landila mutindu mu kele na dyambu. Beno me mona?

¹⁶⁸ [Kisika ya mpamba na bande—Mu.] . . .? . . . [Kisika ya mpamba na bande.] . . .? . . . kizizi. Moise vwandaka na ntwala ya Mongo ya Shekinah. Yawu sobaka kizizi ya yandi. Ntangu yandi kulumukaka, yandi lendaka—samu na kutula vwale na kizizi ya yandi, muvungi-profete Moise; yina Yehowa vwandaka na kati, na kitini, kaka kitini, kizizi ya yandi. Yandi vwandaka na Ndinga na yinwa ya yandi.

¹⁶⁹ Kasi beno tala ntangu Muvungi ya Nene vwandaka na ntwala ya Shekinah. Yinki yawu salaka? Ya sobaka dibanza ya Yandi nyonso. Yandi vwandaka kaka ve kitini ya Nzambi, Yandi vwandaka nyonso ya Nzambi! Yandi vwandaka Emmanuel.

Samu na yinki bawu salaka mutindu yina samu na kuvwanda mivungi?

¹⁷⁰ Beno tala! Beno me mona, ntangu yayi, Nzambi ya Ngolo nionso talaka . . . ke kukitalisa Yandi mosi, mu zola tuba, na Moise muvungi-profete. Beno tala mbote mutindu Nzambi kukitalisaka Yandi mosi. (Yayi kele disolo ya munu ya nsuka.) Beno me mona yandi, ya kutelama ya kupakulama na ntwala ya Dikunzi ya Tiya! Muntu ve na zulu ya mongo kasi Moise mpe Yehowa. Amen! *Amen* zola kutuba “ya vwanda mutindu yina.”

¹⁷¹ Beno tala! “Tula diboko na ntulu ya nge!” Kasi, beno tala kidimbu yayi zole na ntangu ndinga. “Tula diboko ya nge na

ntulu.” Beto ke na kikuma ya kukwikila ve ti Moise kwendaka, na yawu yandi simbaka diboko ya yandi ya kibakala na ntulu ya yandi, samu ti bantu mingi kele ya diboko ya kibakala. Yandi me tula diboko ya yandi ya kibakala. . . Ntangu yayi beno tala mbote! Wapi kizizi beto ke mona awa, ya Yehowa na Moise muvungi-profete! Moise vwandaka talisa Nzambi, samu Nzambi vwandaka na kati ya Moise. Beno tala yandi mbote kutula. . . “Diboko na ntulu ya nge.” Yinki kidimbu yayi!

¹⁷² Ntangu yayi, yandi me telama, me simba diboko ya yandi ya kibakala na zulu ya ntima ya yandi (ya kutelama mutindu yayi) kisika kinsweki yina me bumbama ya mpulusu me bumbama kubanda mbatukulu ya yinza. Tala kikuma ya mivungi. Yesu kele ya diboko ya kibakala ya Nzambi, beto nionso me zaba. Ya kele na Moise ke talisa Yandi kieleka. Yandi bumbaka mansweki ya Tata, mpe me lakisa beto yawu. Beno tala, beno tala yandi ke benda diboko ya yandi ya kibakala yina ba me bula na lèpre. Yina ke talisa yina Nzambi ke sala na Diboko ya Yandi ya Kieleka. Beno tala, kimbevo ya wazi kele na nkisi ve. Beno tala, diaka, yawu vwandaka ve ya kufuluka na wazi, yawu vwandaka na kitezo ya yawu ya nsuka, mpembe mutindu mvula mpembe; diboko ya yandi ba bulaka yandi na kima mosi ya boma. Wapi mutindu Moise lendaka kuwa na ntangu yandi bendaka diboko ya yandi ya kibakala na ntima ya yandi, kuna na ntulu ya yandi, mpe diboko ya yandi ba bulaka yandi na kimbevo ya wazi! Lèpre ke talisa disumu, yina ke belukaka ve, mpe mingi-mingi na kitezo ya yawu ya nsuka.

¹⁷³ Mpe, bampangi, ya ke kisika yina yinza vwandaka na ntangu Nzambi basisaka Diboko ya Yandi ya Kibakala na ntulu ya Yandi! Ba me bula yinza na lèpre ya lufwa, mpe ya ke na nkisi mosi ve samu na yawu. Na yina ya kele na nkokila yayi, samu ti bawu ke kuzwa nkisi ve. Nkisi yina me salama na Calvaire, kasi bantu zola baka mukanda yina me salama na kisika ya mukanda ya Nzambi samu na disumu.

¹⁷⁴ Beno tala yawu malembe-malembe, mutindu kieleka ya kimbevo ya wazi ke salaka, kasi na mbala mosi! Ntangu yandi bendaka diboko ya yandi, ba bulaka yawu, ya vwandaka ya kufuluka na wazi. Beno tala yina Nzambi tubaka, “Ntangu yayi, beno ke tambula ve malembe-malembe na disumu; kasi kilumbu beno ke kudya yawu, kilumbu yina beno ke kufwa.” Mpe ya kele kieleka, “Kilumbu beno ke kudya yawu.”

¹⁷⁵ Beno tala, ya vwandaka muvungi-profete yina kufwaka yandi mosi. Yandi bakaka, na nzila ya musiku ya Nzambi, mpe kotisaka diboko ya yandi mosi na ntulu ya yandi, mpe bendaka yawu na lèpre. Muvungi-profete salaka yawu yandi mosi. Mpe Muvungi-Profete yayi ya Nene, Yesu, salaka yawu Yandi mosi, “Mu me tula luzingu ya Munu kuna, muntu mosi ve ke baka yawu na Munu.” Yandi vwandaka Muvungi ya Nene, Muvungi-Profete ya Nene, “Muntu mosi ve ke baka yawu na Munu, Mu ke sala

yawu samu na Munu mosi.” Beno tala ya me kwisa malembe-malembe ve, ya me kwisa na muniti mosi. Muvungi ya Nene, Yandi mosi, bakaka dyambu ya beto mpe Yandi lwataka yawu, bakaka masumu ya beto mpe tulaka yawu na zulu ya Yandi mosi. Kuyituka ve ti poète sonikaka:

Matadi pasukaka mpe mpimpa kubwaka,
Mvulusi ya munu kulumusaka yintu ya Yandi
mpe Yandi kufwaka;
Vwale yina pasukaka mpe monisaka Nzila
Na kiese ya Zulu mpe kilumbu ya kukonda
nsuka.

¹⁷⁶ Kinsweki yina vwandaka na ntulu ya Nzambi bamvula yayi nionso, ya kufikama na diboko ya Yandi ya kibakala, Yesu. Muvungi ya Nene bakaka na zulu ya Yandi mosi dyambu ya beto. Esaie 53:6, me tuba, “Yandi lwalaka samu na masumu na beto. Yandi waka mpasi samu na masumu ya beto ya nkú. Kitumbu ya ngemba ya beto kubwaka na zulu ya Yandi. Mpe na bamputa ya Yandi beto me beluka.” Kinsweki ya Nzambi me tulama na ntulu ya Yesu Klisto, to Nzambi, Yandi vwandaka na diboko ya kibakala ya Nzambi, yina kele Dimeme yina kaka bikalaka na ntulu ya Yandi. Ya kele samu na yina kifwanikisu ya Yawu lendaka vwanda kaka dimeme! Yina vwandaka dimeme ya ntete, yina vwandaka Dimeme. Yawu yina ya lombaka ti bawu kwisa na muvungi, kuzaba wapi mutindu kukeba Mameme ya yandi. Beno me bakula Yawu? Beno tala, “Yandi lwalaka samu na masumu ya beto, waka mpasi samu na masumu na beto ya nkú, kitumbu ya ngemba ya beto na zulu ya Yandi.”

¹⁷⁷ Beno tala, yawu me vutuka na nswalu; mpe yawu me basika na nswalu, diboko ya kibakala me basika na ntulu mbala zole. Kimbevo yina ke kufwaka ve, ntangu yandi kumaka na mbala zole. Mpe ntangu Muvungi ya Nene, Dimeme-Profete, ntangu Yandi tubaka. . . Na kulunsi ya Calvaire, na ntangu Yandi futaka kitumbu ya disumu samu na beto nionso, Yandi tubaka, “Yawu me mana.” Disumu vwandaka me mana, ba me futa kitumbu, ba me futa bamfuka! Ya me bakaka mvula mosi ve, to na nsuka kwisaka na kati ya yawu na bilumbu ya nsungiki yankaka to kima mosi, ya sukaka kaka na ntangu yina!

¹⁷⁸ Disumu kwisaka na mwa ntangu fioti, na nzila ya kufwa musiku ya Musiku ya Nzambi, na nzila ya kuzenga Ndinga mosi. Na nkokila yayi, bampangi ya munu, moyo ya beno kele na zulu ya difelo na muniololo. Mpe muniololo yina kele ve malongi ya seminere, muniololo yina kele ve denomination to credo yina beno ke zinga, kaka mutindu yina kele Ndinga ya Nzambi! Yesu pesaka bantu Ndinga ya Yandi samu na kuzinga, mpe Eve bukaka kaka mwa kitini ya Yawu. Mpe . . . konso muniololo kele ngolo ve na kisika ya yawu ya kulemba. Ntangu beno ke baka Ndinga mosi. . . Yina vwandaka Buku ya ntete.

Yesu kwisaka na kati-kati ya Buku, mpe tubaka, “Muntu ke zinga kaka na dimpa ve, kasi na Ndinga nionso yina ke basika na yinwa ya Nzambi.” Yina vwandaka kati-kati ya Buku.

Buku ya nsuka, Yandi tubaka, “Muntu nionso yina ke baka Ndinga mosi (muntu ya mayele ya Ndinga mosi), kukatula Ndinga mosi na Awa, mu ke katula ndambu ya yandi na Buku ya Luzingu.” Beno ke luta na difelo, ya kunamika na Ndinga ya Nzambi. Beno bika ve muntu mosi kubaka kima mosi na kati ya beno ya kele ve **MUTINDU ME TUBA MFUMU!**

¹⁷⁹ Oh, mu ke mona. . . Mbote, bawu ke tuba, “Ya kieleka, nionso yina beto me sala. Nionso yina beto me sala!” Yawu yina ya lendaka vwanda banganga-Nzambi ya mbuta mpe bawu banzaka ti na bilumbu ya Muvungi ya Nene. Yawu yina Eve banzaka. Yawu yina Satana tubaka na yandi, “Ya kieleka Nzambi ke sala yawu ve.” Kasi Yandi salaka yawu, samu Yandi tubaka ti Yandi ke sala yawu. Mpe ya kele samu na yina Yandi ke sala yawu diaka bubu yayi.

¹⁸⁰ Kuyituka ve, mutindu Yandi tubaka, “Mutindu ya vwandaka na bilumbu ya Noé, kisika mioyo nana vulukaka, na nzila ya maza, mutindu mosi yawu ke vwanda na nkwizulu ya Mwana ya muntu.” Beno me mona, “Samu mwelo kele ya fioti, mpe nzila kele ya fioti mingi yina ke nata na Luzingu, mpe bantu fioti ke mona Yawu.” Ya kieleka. “Samu nzila kele ya nene yina ke nata na kubeba, bantu mingi ke kota kuna.”

¹⁸¹ Ntangu ba bulaka Muvungi ya Nene, Profete Ya Nene, ntangu ba bulaka Yandi kuna, Yandi tubaka, “Ya me mana!” Mpe na muniti yina, kaka na ntangu Muvungi yayi ba me bula, ya me mana. Disumu me suka, disumu vwandaka diaka ve. Bawu vwandaka ya kutsyema, ba futaka mfuka ya kitumbu. Bakwikidi yina bankumbu ba sonikaka na kati ya Buku ya Luzingu, bayina ba soolaka ntete katuka mbandukulu ya yinza, ya sukaka kaka na ntangu yina Yesu tubaka ti ya sukaka. Yandi, Muvungi yina ya Nene, kwisaka samu na mameme ya Yandi. Yawu manaka, diboko ya Nzambi katukaka na ntulu ya Yandi, kubulama. Na yina na Paki Yandi vutulaka yawu (amen), Yandi vumbulaka yawu diaka na ntulu ya Yandi, mpe kwendaka kutana na yawu na beno mpe munu, na mutindu ya Ndinga ya Yandi, samu na kuvulusa beto na disamba ya ntete na yina disumu katulaka beto. Kinsweki ya Yandi ya nene me monisama pwelele na nzila ya Muvungi ya Profete. Ya kumonisamaka pwelele na Muvungi, Muvungi-Profete.

¹⁸² Kuyituka ve miongo kubwaka mpe bokaka na kilumbu yina. Kuyituka ve ti mwini kubumba kizizi ya yandi mpe bokaka na kiese. Kukondwa ntembe ti nkadulu nyonso me beba; mupepe me ningisa bayinti tii bawu me ningisa mpe me ningisa, mpe kyese, mpe me dumuka. Bawu monaka Muvungi-Profete, kuna na mongo, kuvulusa konso nkumbu na Buku ya

Luzingu. Mpe bawu monaka ti nkadulu ya bawu mosi vwandaka ya kuvulusa! Bawu bokaka, mpe lemukaka na zulu. Mpe yinza vwandaka kwenda na kuningana ya ntoto. Mpe myongo kubwaka, mpe matadi kubwaka. Mpe mwini dindaka. Mpe—mpe bima nionso salamaka. Mutindu lukutakanu mosi, ntangu Muvungi ke monisa na beno ti “yawu me mana!” Kuna . . .

¹⁸³ Mu me monaka yandi kudumuka-tengu, mpe kyese, kasi ya vwandaka ve na muntu yina vwandaka talisa mpasi. Myongo basikaka, mpe bawu . . . mwini kwendaka, mpe nionso salamaka, kasi muntu mosi ve monaka mpasi. Mpe mu me monaka balukutakanu kisika ngolo ya Nzambi me monisama na bantu ti bawu “vwandaka na kimpwanza ya yinza mpe bima ya yinza,” mpe kiesa ya Mfumu me fuluka na dibuundu. Bawu telemaka mpe bokaka, mpe dilaka, mpe bawu bokaka na ndinga ya ngolo, samu na nkembo ya Nzambi. Mu me monaka ntete ve kisalu ya kulutila nene, ba vwandaka kaka ntangu nyonso ya kusungama; samu ti ba zabaka bawu ti, nkumbu ya bawu yina ba sonikaka na Buku ya Luzingu ya Mwana-dimeme na ntuala ya mbandukulu ya yinza. Profete-Muvungi yayi ya nene natilaka bawu Nsangu, mpe bawu vulukaka, Profete-Muvungi. Ata yina bantu ya dibuundu yankaka tubaka na yina me tadila Yawu, bawu zabaka yina salamaka. Kaka mutindu mivungi ya bawu salaka kuna na manima, bawu zabaka yina salamaka.

¹⁸⁴ Muntu ve kele na muswa ya kukota na chaire ya santu samu na kulonga Ndinga tii kuna yandi ke sala mutindu Moise salaka, yandi ke kutana na Nzambi, yandi mosi, na zulu ya ntoto sika wapi kele ata muntu ya théologie lenda tendula Yawu ve. Moise vwandaka kuna! Ata yinki mutindu minati nsangu ya Israel tubaka, “oh, ya vwandaka buzoba, beno ke banza kaka ti beno monaka yayi; ya kele buzoba,” beno lendaka ve kukatula Yawu na yandi, yandi zabaka! Yandi vwandaka kuna! Yandi vwandaka yandi yina salamaka! Mpe muntu ve na diplome ya théologie to diplome ya doctorat kele na muswa na manima ya chaire, samu na kulomba Nsangu ya Yesu Klisto, tii kuna yandi me kutana na Nzambi mbunzu na mbunzu na Dikunzi ya Tiya. Yandi ke na muswa ve ya kukibokila yandi mosi munati nsangu, samu ti ba-théologien nyonso na yinza lendaka ve kutendula Yawu na beno. Ya salamaka na beno! Beno vwandaka kuna, beno zaba yina me tadila Yawu. Ata nionso yina muntu yankaka lunga tuba, to yinki mutindu bawu lunga tuba, “bilumbu me luta, yawu ke mutindu yina ve,” beno . . . ya me salama na beno, mpe ya kele landila Ndinga.

¹⁸⁵ Yinga, kikuma yawu yina Moise zabaka Ndinga yayi tubaka na yandi, vwandaka Ndinga ya Ndinga. Yandi zabaka ti Nzambi tubaka na Abraham, “Nkuna ya nge ke zinga bamvula nkama yiya, kasi Mu ke vuukisa bawu.” Mpe yandi zabaka ti bamvula bankama yiya vwandaka ya kutelama mpe ba bokilaka yandi na kusala yawu.

¹⁸⁶ Bakala mpe bakento, Nzambi silaka na bilumbu yayi ya nsuka ti Yandi ke tiamuna Mpeve ya Yandi na zulu ya bantu nionso. Yandi silaka ti Yandi ke fidisa Mbotika ya Mpeve-Santu, mpe Yandi ke bokila Kento ya makwela kukondwa ditona to mifutu. Yandi silaka na kusala yawu, Yandi ke sala yawu. Kuwa movungi yayi ve, bawu ke twadisa beno ntama ya yimbi. Mpeve-Santu kele Muvungi samu na kudisa beno madia na Ndinga yayi. Ya ke kwisaka ntangu nionso na Muvungi. Yandi kele Muvungi ya beto. Beno kuwa Yandi, beno kele mameme ya lupangu ya Yandi; kana beno kele, beno ke kuwa Ndinga ya Yandi. Ve yina muntu yankaka ke tuba, beno ke kuwa yina Yandi ke tuba. Ndinga ya nzenza, beno zaba kima mosi ve samu na yawu.

¹⁸⁷ Oh, la la, beno kuwa diaka movungi-profete ya ngolo, ke tendula mpe ke talisa na bawu, Jean (ntangu yandi telemaka na nzadi ya Jourdain), tala yina yandi tubaka (vwandaka kuna, ke longa), yandi tubaka, “Ngunga ke kwisa . . .”

¹⁸⁸ Beno tala, Jean vwandaka mwana ya nganga-Nzambi. Ba ke landaka ntangu nionso nzila ya tata ya bawu, ya kele mutindu beto kuzwaka bankumbu ya beto. Ata nyonso yina bawu vwandaka sala, bawu vwandaka bokila bawu yawu. Mpe Jean zolaka vwanda nganga-Nzambi mutindu tata ya yandi.

¹⁸⁹ Mpe, beno zaba, mama ya yandi, ntangu yandi kumaka na kivumu, na manima Wanzio ya Mfumu kutanaka na tata ya yandi Zacharie, mpe me kwenda na yinzo ya Élisabeth, mpe yandi vwandaka yimeni bangonda sambanu na . . . samu na kuvwanda mama. Kasi yandi vwandaka ve na luzingu na kati ya yawu ntete, yandi vwandaka na boma samu bébé vwandaka ningana ve. Ya kele na nsi ya kima yina lendaka salama.

¹⁹⁰ Mpe Mpeve-Santu, Wanzio ya Mfumu monikaka na Marie, mpe tubaka na yandi ti yandi zolaka “kuzwa bébé, kukondwa kuzaba bakala,” mpe tubaka na yandi diambu ya Élisabeth.

¹⁹¹ Yandi me mata myongo ya Judée, samu na kutuba Élisabeth. Mpe ntangu yandi kukutanaka na Élisabeth, yandi tubaka na yandi ti yandi “ke vwnda mama.” Mpe yandi lendaka bakula yawu ve, “yandi zabaka muntu mosi ve.” Kasi yandi tubaka, “Mpeve-Santu fikaka munu na kivudi, mpe tubaka ti kima yayi ya Santu yina ke butuka na munu ba ke bokila yandi ‘Mwana ya Nzambi,’ mpe mu ke bokila Nkumbu ya Yandi ‘Yesu.’” Mpe na mbala ya ntete ti nkumbu ya Yesu kutubamaka na bikoba ya muntu, mwa bébé ya kufwa, na kivumu ya mama ya yandi, vwandaka dumuka na kiese mpe vwandaka boka; mpe vwandaka dumuka na kati ya kivumu ya mama, mpe yandi vwandaka me kuzwa luzingu ntete ve.

¹⁹² Nkumbu ya Yesu Klisto na kuzonzamaka kotisaka luzingu na bébé ya kufwa. Yinki Yawu fwana sala na dibuundu yina ke tuba ti kubutuka mbala zole?

¹⁹³ Mpe beto ke vwanda mutindu verrue na cornichon, mpe ke bika bima ya mutindu yina kulandila. Mpe ke na boma ya kutelama mpe kupesa kimbangi ya beno, mpe kubedisa buzoba nyonso yayi, kusala Yesu Klisto mutindu mosi mazono, bubu yayi, mpe kukonda nsuka. Ya kele ntangu ya Nowele, basika na Tata Me vwanda ntama mpe nyonso yina, ntama na buzoba yina ya mumbongo. Konso kisika yina beno me kuwaka samu na tata ya Nowele na kati ya Biblia? Ya kele disolo ya Rome, ya kele ve na kima na yawu na nyonso, ya kele ve na kima mutindu yina. Beno longisa ve bana ya beno buzoba mutindu yina. Ntangu kilumbu mosi beno ke tuba na yandi ti ya vwandaka disolo ya kufwa meso mingi, kuna beno me vuna mwana ya beno. Mpe ya ke talisa kimbangi ya beno na yina me tala Yesu Klisto, yandi ke tuba, “Ya lenda vwanda ti Ya kele kima mutindu mosi.” Beno tula Yesu Klisto Muvungi-profete ya Nene kuna na Nowele kisika Yawu kele.

¹⁹⁴ Beno tala, beno kuwa profete yayi, Jean, mutindu yandi kele ya kutelama kuna. Beto nyonso zaba ti yandi vwandaka muvungi-profete ya nene. Ntangu yayi, yandi vwandaka na nsangu, Wanzio zabaka ti yandi ke talisa Yesu.

¹⁹⁵ Ntangu yayi, yandi lendaka kwenda ve na seminere. Ba ke tuba, “Ntangu yayi, beno zaba ti Docteur *Kingandi* kele kaka muntu yina ke baka kisika yina ntangu yayi. Beno fwana lakisa yandi. Mpe beno zaba ti kaka. . .” Beno me mona, yandi zolaka vukana ve na bantu.

¹⁹⁶ Na bamvula yivwa, ba me tuba na beto, yandi kwendaka na ntoto ya kuyuma samu na kuyidika Nzambi. Kele kisika yina mivungi kwisaka. Beno tala nsangu ya yandi vwandaka ve mutindu théologien, na ba-diplome ya nene, ya kifuluka na ba-diplome. Yandi tubaka, “Oh, beno ke nsungi ya banioka.” Yandi tubaka na bantu ya nsambululu, “Beno ke nkonga ya banioka.” Ya kele yina yandi monaka na ntoto ya kuyuma, yandi monaka nyoka. Kima ya kulutila yisi yina yandi vwandaka nyoka, mpe yandi bokilaka bawu banganga-Nzambi mpe banganga-Nzambi mpe ba-théologien ya kilumbu yina, “Nkonga ya banioka!” Yandi tubaka, “Nani me kebisa beno na nganzi ke kwisa? Beno banda ve na kutuba, ‘Beto kele ya *yayi*, mpe beto kele ya *yina*,’ samu ti mu ke tuba na beno ti Nzambi lenda kitula matadi yayi samu na kubasisa bana ya Abraham.” Matadi, yina yandi monaka na ntoto ya kuyuma. “Mpe, ba me tula yawu na nsimbulu ya yinti.” Yawu yina yandi vwandaka mona: banioka, bayinti, ntoto ya kuyuma. Mpe, beno me mona, yina vwandaka nsangu ya yandi. Yandi zabaka ve bandinga yayi ya nene ya maye ya seminere (lungaka tendula Yawu na mutindu nionso), yandi longaka kaka kieleka nzila ya yinza.

¹⁹⁷ Yawu yina beto ke talisa awa: nkawa ya muvungi, muvungi, mameme, ndonga ya yinza.

198 Yinki yandi salaka? Yandi vwandaka na kima ya nene ya kusala, yandi vwandaka yina zolaka zaba Mesiya. Yandi tubaka, “Mu ke tuba, ‘Yandi kele ya kutelama awa na kati-kati ya beno ntangu yayi. Mpe beno zaba Yandi ve, samu ti théologie ya beno me kanga beno mingi, beno zaba ve kisika beno kele.’”

199 Kilumbu mosi Yesu ke basika, yandi tubaka, “Tala, Mwana-dimeme ya Nzambi yina ke katulaka disumu ya yinza.” Mwana-dimeme! Alleluia! Kukatula masumu ya kieleka! Kuna kwisaka yina mameme nionso na disamba ya Eden kuna vwandaka talisa, Bakala mosi mutindu bantu nionso vwandaka tambula kuna na nzadi.

200 Bawu tubaka, “Jean, wapi mutindu nge zabaka Yawu? Mu monaka kima yankaka ve.”

201 “Kasi mu me pesa kimbangi, mu monaka Mpeve ya Nzambi kukulumuka mutindu yembe, mpe Ndinga tubaka, ‘Yayi kele Mwana ya Munu ya Luzolo na kati ya Yandi Mu me sepela na kuzinga.’”

202 Beno tala Yembe mpe Mwana-dimeme. Beno me mona? Yinga. Yinki lungaka salama kana yawu vwandaka. . . yinki lungaka salama kana yawu vwandaka. . . Yinki lungaka salama kana yawu vwandaka kibulu ya kutelema kuna? Mbote, Mwana-dimeme yina lendaka kwisa ve na. . . to Yembe yina. . . Nzambi talisaka Yandi mosi na yembe, ndeke ya kulutula pima na kati ya bandeke nionso ya mazulu; Mwana na Yandi ya bakala na nzila ya dimeme, ya kulutula pima na baniam nionso na zulu ya ntoto. Beno me mona, ndeke ya mvindu ya mazulu, ngoyi-ngoyi ve; koko-mbele ve, kasi yembe. Ve ngulu, kasi mwana-dimeme. Ata ti nkadulu yankaka zolaka vukana ve.

203 Mpe beno tala na ntangu Yembe kwisaka na zulu ya Mwana-dimeme, Yandi twadisaka Yandi. Ya ke mutindu yina ve Yandi lunga sala, kasi mutindu Tata lunga twadisa Yandi. Yina ke mutindu mwana-dimeme ya kieleka bubu yayi. O dimeme ya Nowele, beno zaba ve ti Nzambi ke twadisaka kaka Ndinga ya Yandi? Ya kele yinti ya Yandi.

204 Beno tala kima ve zolaka baka kisika, kasi Jean tubaka, “Bayankaka ya bawu kumonaka Yawu ve, kasi mu ke pesa kimbangi, ‘Mu monaka Yawu.’” Ke talisaka: “Beno tala, Mwana-dimeme ya Nzambi yina ke katula masumu ya yinza.”

205 Bika mu talisa ntangu yayi Nsangu ya munu ya Nowele, mpe na yina mu ke sukisa ntangu yayi: “Yesu Klisto, mutindu mosi mazono, bubu yayi, mpe kukonda nsuka.” Ya kele Mwana-dimeme mosi yina. Yandi kele kaka Mwana-dimeme bubu yayi mutindu Yandi vwandaka kuna. Yandi kele kaka awa mutindu Yandi vwandaka kuna, samu ti Ndinga ya Yandi kele mutindu mosi. “Kisika zole to tatu me vukana na Nkumbu ya Munu, Mu kele na kati-kati ya bawu.” Ya kieleka yawu yina Yandi tubaka. Yandi ke sobaka ata fioti ve, Yandi kele Nzambi Ndinga. Yandi ke

sobaka ata fioti ve; ke pesa diaka mameme ya Yandi, mpe ke disa bawu na nzila ya Muvungi-Profete ya Yandi, madia ya mameme ya Yandi ntete. Ve na théologien; na dimeme ya Yandi.

206 Bawu lenda ve . . . Yinki mutindu bayankaka lenda kudia Yawu. Kasi ndwenga . . . Beno tala yayi! Kasi bantu ya ndwenga mpe ya mayela, yina me longoka na yinza, zola kutuba ti ya kele na Tata ya Nowele. Mpe kele na mitindu nyonso ya kuningana mpe kima yina bawu ke sambila, samu ti bawu ke ndima Yandi ve, Ndinga; samu na ba denomination ya bawu, Yandi ke salaka ve ntomo ya bawu, muvungi ya bilumbu yayi. Ba-mercenaire ya credo, tina ke zola kuvukisa beno na nsi ya nkombo, beno kwikila yawu ve! Ba ke twadisa beno na abattoir. Beno kuwa Muvungi ya Nene yina me butuka na bamvula funda mosi na nkama yivwa me luta, na ngonda yayi. Na ntangu mosi kuna, na Nsangu ya Yandi, kwisaka na mivungi ya kieleka yina zabaka yinki mutindu kukeba mameme.

207 Mu monaka ve, bawu ke na nsatu ya yawu. Bawu ke ndima Yawu ve bubu yayi, kaka mutindu bawu salaka ntete ve, samu ti ya ke sala ve luzolo ya bawu ya dibuundu. Bawu ke balula Ndinga yina mpe ke sala yawu mutindu organisation ya bawu, mpe bawu ke longa Ndinga ve. Bawu ke sala yawu ve! Ba ke tuba, “Mbote, yina vwandaka bilumbu ya bantumwa. Ya zola kutuba yayi ve.” Ya zola kutuba kaka kieleka yina Yawu ke tuba, Yawu ke na nsatu ya muntu ve . . . ? . . . ke tendula Yawu samu na bawu.

208 Ntangu yayi beto kulumusa bayintu ya beto mpe bantima na beto na zulu ya putulu ya ntoto, mpe yina me kumisa mpasi mingi na kidikilu, samu na kumona mpe kuzwa Nsemo yina Ndinga yayi ke nata pene-pene ya Muvungi: Profete-Muvungi ya Nene, Yesu Klisto Mwana ya Nzambi. Mu me tuba na beno ntangu ya yinda. Ya lendaka vwanda ti mu me yidika ve bampova ya munu mutindu banganga-Nzambi, mu ke mekaka ve na kusala yawu. Mu ke meka na kuzonza Yawu kaka mutindu Yandi ke pesa Yawu na munu.

209 Kasi, beno ke mona samu na yinki bawu vwandaka na mivungi? Bayankaka longokaka mingi na dibanza yankaka ti bawu ke kuzwa Yawu ve. Mpe bubu yayi beto kele na basurveillant ya mutindu nionso, bakala ya kizunga, ba-évêque, banganga-Nzambi, ba-cardinal, ba-pape, bima nionso na yinza, samu na kumeka kutwadisa beto. Kasi Nzambi me pesa beto Muvungi, mpe Muvungi yina kele Mpeve-Santu.

210 Beno kuwa munu ntangu yayi. “Ntangu Yandi . . .” (ve dibanza, *Yandi* kele kiyingilu kimuntu) “Ntangu Yandi Mpeve-Santu ke kwisa (Mpeve ya Kieleka), Yandi ke talisa bima yayi na beno yina mu me tuba na beno, mpe ke talisa na beno bima yina ke kwisa.” Yina ke Muvungi ya Nene, Yina ke Muvungi Yesu me yambula. Mpe Mpeve-Santu sonikaka Biblia, Biblia me tuba mutindu yina, “Muntu ya ntama, vwandaka ya kutwadisama

na Mpeve-Santu, yandi sonikaka Ndinga.” Ntangu yayi, Mpeve-Santu lunga benda beno na credo mosi? Yawu lunga benda—kubenda beno na kima yina Ndinga yayi ke tuba ve? Na yina, ya ke vwanda nionso mpasi mingi. Mpeve-Santu ke vwanda muntu ya luvunu kana Yandi tubaka ti “*Yayi* kele yina beno fwana sala,” mpe na manima beno baluka mpe beno tuba, “Ve, Ya vwandaka kifu, mpe beno ke sala yina dibuundu ke tuba na kusala.”

²¹¹ Ntangu yayi, kana beno kuwaka kima mosi, kima yankaka me bika beno ntama na kieleka, Muvungi ya kieleka yina ke twadisa beno na Ndinga, Mpeve-Santu, mpe beno kele ve na kimbangi, mpe beno kele ve na kimbangi ya Mpeve-Santu na luzingu ya beno, yina kele ve. . .

²¹² Nzambi kele Mosi. Nzambi kele kaka yandi yina kele na Luzingu ya Kukonda nsuka, mpe Yandi kele Luzingu ya Kukonda nsuka. Mpe nyonso yina kuzwaka mbandukulu kele na nsuka. Mpe kana beno kele kaka mambele ya dibuundu, ya kuzwaka mbandukulu. Kasi Ndinga ya Nzambi kele na ata mbandukulu ve, Nzambi kele na ata. . . Mpe ntangu beno kele ya kubutama na Nzambi, beno kele ya kubutama na Ndinga, na yina beno ke kuma mwana ya Nzambi, mpe ba ke tula nkumbu ya beno na Buku ya Luzingu ya Mwana-dimeme ntete mbandukulu ya yinza. Mpe beno, ntinta ya bansuki beno ke na yawu, ntinta ya beno, ntela yina beno kele, Nzambi monaka beno na ntuala ya mbandukulu ya yinza. Mpe Yandi monaka nge, muntu, mutindu nge kele. Mpe ata ti ya me kuma na mafuku ya bamvula, ya kele na kima ve yina lenda kanga beno na kuvutuka na manima ya kulunga yina kizizi yina Nzambi tumaka na beno na mbandukulu, “Mameme ya Munu ke kuwa Ndinga ya Munu, nzenza bawu ke landa ve.”

²¹³ Mpe kana beno me ndimaka ve Luzingu yango ya Kukonda nsuka, na nkokila yayi, mpe beno ke tala na disolo mosi ya luvunu ya mwa bébé mosi me lala kuna na kati ya kidikilu, mpe nkonga ya bantu ya ndwenga yina kele pene-pene, beno kwikila ve bima ya mutindu yina. Mpe mu ke meka na kubanza, “Mbote, mu ke vwanda mbote. Mpe mu ke sala *yayi*. Mpe mu ke kuma mosi ya dibuundu. Mpe yawu yina kaka mu ke na yawu nsatu ya kusala.” Beno kele ya kuzimbana. Kana beno kele ve na Luzingu ya Kukonda nsuka, wapi mutindu beno lenda zinga kukonda nsuka?

²¹⁴ Beno lenda baka mbuma ya disangu, mu ke tala ve mutindu ya kulunga ya ke tala, beno lenda sala nionso. . . Science me sala mosi, ti beno lenda zibula yawu: ya kele na madidi ya mutindu mosi, mutindu mosi ya ntima, bima ya mutindu mosi yina ke kula na bilanga, kima ya mutindu mosi. Beno lenda tula bawu na laboratoire, mpe beno lenda ve kutuba mosi na yankaka: mosi ke sala kaka dimpa ya kitoko ya masangu mutindu yina yankaka, mpe ke sala flocon ya masangu. Kasi mutindu mosi kaka beno lenda tuba na bawu, kele kuzika bawu. Muntu yina me salama,

kele kuna, ke pola mpe ke mata ata fioti ve. Kasi yina Nzambi salaka, kele na nkuna ya luzingu, ya ke zinga diaka.

215 Beno lenda mekula Muklisto, beno lunga kwenda na yinzo-Nzambi mutindu Muklisto, beno lenda tula nkumbu ya beno na buku mutindu Muklisto, beno lenda kota na denomination mutindu Muklisto; yina ke vwanda mbote, kasi kana Luzingu ya Kukonda nsuka kele na kati ya beno ti Muvungi ya Mbote pesaka Luzingu ya Yandi, samu na kukabula . . . Ntangu Nzambi kulumukaka na Pentecote, Yandi kulumukaka kuna na kati ya dibulu ya tiya mutindu Yandi salaka na Mongo ya Sinai, mutindu Yandi salaka na mvungi ya ntete, Moise. Mpe ntangu Yandi kulumukaka, Yandi kukabukaka Yandi mosi na bandinga ya tiya yina vwandaka ya kuvwanda na zulu ya mosi na mosi ya bawu, Nzambi kabulaka Yandi mosi na kati ya bantu ya Yandi. Mpe kana beno me kuzwaka yina . . . Pierre tubaka ti “Ya kele samu na beno, mpe na bana ya beno, na bawu.”

216 Bankundi, beno ke kuwa ve luvunu ya théologie, beno butuka mbala zole. Mpe ntangu beno kele, Mpeve yina kele na kati ya beno kele kitini ya Nzambi, mpe bambangi na konso Ndinga ya Nzambi kele “Kieleka.” Kana beno ke na nzingulu yina ve, beto kwenda mbangu na kidikilu, Ndinga. Beto kwenda mbangu na Biblia, ntama na mabuundu yayi ya kuyidika na bafelele ya bampova ya théologie, na kidikilu ya kieleka, na Ndinga ya Nzambi kisika Mesiya me zabana.

Na bayintu ya beto ya kukulumusa, beto sambila.

217 Nzambi ya luzolo, kaka yina mu zaba kutuba na ntangu yayi. Beto ke na kubelama na Nowele, babala-bala kele ya kifuluka na babakala mpe bakento, bana-babakala mpe bana-bakento, ke na kupusa, ke na kutindika, ke na kumeka na kusumba dikabu mosi samu na kupesa na muntu yina ke sala mutindu mosi samu na bawu. Bantu mingi yina ke bokilaka bawu mosi Baklisto na babala-bala ya kusumba makaya, ngolo, samu na Nowele. Nzambi, ya ke talana mutindu ti ba ke na losa yawu kaka na kizizi ya Nge, na kulongaka bana ya bawu mwa disolo ya luvunu, ya Rome, théologie ya mumpani ya Santu Nicolas, mwa masolo ya luvunu yina me ndima ve na yinza, mpe bawu ke losa Klisto ya kieleka ya Nowele, Mwana-dimeme ya kieleka.

218 Nzambi, mu ke sambila, na nokokila yayi, ti na yina beto ke na bayintu ya beto ya kubaluka na fundu-fundu yina Nge me nata beto, . . . Nge tubaka na Abraham mbala mosi, profete-muvungi ya nene, “Kwenda kuna, Abraham, mpe tanga zyelo yina kele na zulu ya mubu.”

219 Mpe yandi vutulaka ndinga, “Bawu kele na mawa, mu lenda ve kutanguna yawu.”

220 Na yina Nge tubaka, “Tala na zulu na mazulu, mpe tanga bambwetete.” Mpe yandi zabaka ti yina lendaka salama ve. Mpe Nge tubaka na yandi, “Nkuna ya nge ke vwanda mutindu yina.”

Beto ke tala nsangu yayi na muvungi-profete yayi, “yina me katuka na putulu ya ntoto, tii na bambwetete ya mazulu,” ti ata ti ya kele na lufwa na banzutu ya beto ya kufwa samu na kunata beto na fundu-fundu, ya kele na Luzingu yina lenda vumbula beto na bambwetete.

²²¹ Mutindu Nge tubaka na profete ya Nge ya nene Daniel, “Mpe bayina zaba Nzambi ya bawu, na bilumbu ya nsuka, ke sala mambu ya nene. Mpe bayina longaka kieleka na bantu mingi ke sema mutindu bambwetete mvula na mvula.”

²²² Mfumu Nzambi, Mvangi ya nene, Yina zolaka kwisa na ntoto na mutindu ya Yesu, samu na muntu kuzaba yina Nzambi vwandaka. Mpe Nge vwandaka Yandi yina kaka lungaka baka kitumbu ya lufwa, Wanzio ve, kiyingilu mosi ve lungaka sala yawu. Beno vwandaka Yandi yina tulaka kitumbu, mpe Beno zolaka kaka kukatula yawu. Mpe na kuvwandaka Mpeve, Beno zolaka kufwa ve. Kasi Nge kumaka muntu samu ti Nge kufwa; mpe kukuma Mwana-dimeme ti Nge katula disumu ya Nge ya Kuvuuka, ti Nge zolaka kuvulusa bawu na nzila ya Menga ya Nge Mosi.

²²³ Oh, disolo kele nene mingi, Mfumu, ya me kwenda na mfumu ya bantu mingi. Kubanza: “Yehowa mwana ya fioti, yina vwandaka kuna na kidikilu, Yandi zolaka zinga mutindu bébé mosi. Yehowa mwana ya fioti, yina me butuka na ntulu. Yehowa mwana ya fioti, ke sakana na bana na bala-bala. Yehowa mwana ya fioti, toko. Yehowa mwana ya fioti, muntu yina vwandaka pesa lukolo. Mpe Yehowa, Ngolo.” Beno bakaka bisika nyonso yayi. “Mpe na manima, Yehowa, Mwana-dimeme. Yehowa, Profete.” Mpe Nge me kuma nionso yayi yina Nge lunga mona mpasi ya masumu ya disumu, mpe kupesa beto Luzingu ya Kukonda nsuka.

²²⁴ Lemvokila beto, O Nzambi, beto, bivangu ya mputu, ya kulunga ve ya yinza yayi. Beto kele na kiadi na nkokila yayi, Mfumu, ntangu beto ke tanga yina Nge salaka samu na beto, mpe na yawu beto me sala bima fioti na kuvutuka. Wapi mutindu Nge kwisaka na bilumbu ya bantwadisi ya nene ya nsambulu! Wapi mutindu Nge lendaka telama mpe kutalisa Ndinga ya Tata! Wapi mutindu Nge me kakulaka ve mabanza ya bawu! Mpe bubu yayi ya ke monana ti ya ke na muntu mosi ve yina zola telama mpe kubokila Ndinga “Ndinga,” mpe kukakula ve. Beto ke sambila, Nzambi, Nge ke lemvokila beto na bima yayi yina beto me bika. Mpe pesa beto na nkokila yayi, na kati ya bantima ya beto, mutindu beto ke pesaka Nge mutindu kidikilu. Mpe beto zaba ti konso ntangu yina Klisto ke ndimama, ya ke na mbutukulu ya malu-malu, ya ke na mwana mosi ya malu-malu, ya kele na kuyimba na Mazulu na nzila ya Bawanzio. Na zulu ya musumuki mosi yina ke balula ntima, Bawanzio ke yimba dyaka.

225 Beto ke sambila, Nzambi, ti kana ya kele na bayankaka awa na nkokila yayi yina me zaba Nge ve mutindu Dikabu ya kieleka ya Nzambi, mutindu Mvulusi ya beno mosi, kaka ve na nzila ya mbanzulu ya dibanza ya nene, kasi na nzila ya mbutukulu ya malu-malu (ya kuvwanda ya Mpeve ya Nge), bika ti bawu kuzwa Yawu kaka ntangu yayi, Mfumu, na bayintu ya beto ya kukulumusa. Mpe kana ya lendaka vwanda na mosi, Mfumu, yina me sala yayi ve, bika ti bantima ya bawu kuzwa kiese ntangu yayi, mpe bawu ke mona mutindu mivungi ya ntama, na kidikilu ya ntima ya bawu, Ndinga, Mesiya; yina ke siamisa na bawu mutindu Mpeve-Santu, Muvungi ya nene ya kilumbu yayi. Beto ke lomba yayi na Nkumbu ya Yesu.

226 Na ntangu beto me kulumusa bayintu ya beto, mpe mu ke na kivuvu ti bantima ya beto me kulumusa, beno zola, mpangi ya munu ya luzolo ya bakala, ata ti beno kele mambele ya dibuundu. . . Mpe mu banza ti mu me lwadisa beno ve na kutubaka yina mu me tuba. Mu. . . Ya kele nyonso ya kulunga na kuvwanda ya dibuundu, beto fwana sala yawu, kasi, O mpangi ya bakala, beno ndima yawu ve, beno fwana butuka mbala zole. Yawu yina Profete-Muvungi ya Nene tubaka, “Beni fwana butuka mbala zole.” Yandi tubaka yawu na théologien, “Beni fwana butuka mbala zole.”

227 Mpe ntangu beno me butuka mbala zole, ya kele ve samu ti beno ke kwikila. Bawu ke tuba, “Nge me butuka ntangu nge ke kwikila.”

228 Kasi Biblia ke tuba, “Dyabulu ke kwikila, mpe.” Ntangu yayi, beno tala, ya kele yawu ve, ya kele kimbangi.

229 Beno ke tuba, “Mbote, mu me zinga luzingu ya mbote.”

230 Mutindu yina bantumwa, kasi bawu butukaka ve tii kuna bawu kuzwaka Mpeve-Santu. Bawu ndimaka ve tii kuna bawu kuzwaka Mpeve-Santu. Beno ke bambuka moyo na mpimpa yina na ntwala ya kuyekula. . . to na kuyekula, kaka na ntwala kuyekula kusalama? Yesu tubaka na Simon Pierre, “Ntangu nge ke ndima, na yina pesa kikesa na bampangi ya nge.” Mpe Pierre landaka Yandi kubanda bamvula tatu na ndambu, mpe basisaka bampeve ya yimbi, mpe belusaka bambevo, longaka Nsangu ya mbote, mpe vwandaka kaka (landila Ndinga) vwandaka me balula ntima ve.

231 Ntangu yayi, beno zola mutindu yina ya—ya Munati nsangu na ntima ya beno na nkokila yayi? Kana—kana kieleka beno zola Yawu. . . Ya ke sala luswaswanu mosi ve na yina muntu yankaka ke tuba, Ya kele kieleka, mpangi-bakala, mpangi-kento. Mu zaba ti yina ke kieleka. Beno zola, na ntangu bayintu nionso kele ya kukulumusa mpe disu nionso ke kangama, ve samu na munu, mu ke kaka muntu, mpangi ya beno, kasi na Klisto beno lunga telemisa diboko ya beno, beno tuba, “Mu ke kwikila Yawu. Mpe ya kieleka mu ke zola ti Klisto kati ya ntima ya munu, Klisto ya

kieleka ya Nowele”? Beno zola telemisa diboko ya beno ntangu yayi? Nzambi sakumuna nge. Yina ke mbote. Nzambi sakumuna nge, mpe. Nzambi sakumuna nge. Oh, la la, bisika nionso.

²³² Bika yawu salama, mpangi-bakala; bika yawu salama, mpangi-kento; bika yawu salama, nkundi ya munu; kuvwanda ya kifuluka na Mpeve ya Nzambi. Wapi luswaswanu ya ke sala yina muntu yankaka me tuba? Beno bambuka moyo, ya kele luzingu ya beno. Beto lenda vwanda ve na zulu ya ntoto na suka, beto kele diaka ve—ata kivuvu ya luzingu ve kulutila yina beto ke na pema na kubwa ya beto ntangu yayi. Beto lenda ata mbala mosi ve kupema, kaka lemvo ya Nzambi. Mpe wapi mbote ya ke sala, ata wapi mutindu mbote beno zingaka mpe yina . . . ? Yesu tubaka, “Kana muntu butuka mbala zole ve, yandi ke vwanda na ndwenga ya kukota ve.”

²³³ Ntangu yayi, mu zaba *ba-terminologie* ya yina me butuka mbala ya zole, kasi beto tala kaka yina salamaka na kati ya Biblia ntangu bawu butukaka. Pierre vwandaka mukwikidi, bantumwa vwandaka mukwikidi, kasi bawu butukaka ntete ve tii na manima ya Mpeve-Santu kulumukaka na zulu ya bawu na Pentecote. Ntangu yayi, bawu vwanda yindula yinki kusalamaka, mpe Pierre tubaka, na bayankaka ya bawu, “Beno bantu ya Israël, ke zabana na beno; Yesu ya Nazareth, muntu yina me siamisa na kati ya Nzambi na kati ya beno na nzila ya bidimbu mpe bimangu mpe mambu ya ngitukulu, yina Nzambi salaka na nzila ya Yandi; Yandi yina ba zabaka katuka ntama, na nzila ya lukanu ya kimvuka beno bakaka na maboko ya nkú mpe komaka na kulunsi, Yina Nzambi me vumbula mpe beto kele bambangi ya Yandi. Yandi basisaka yayi yina beno ke mona mpe ke kuwa ntangu yayi, mpe ya kele landila Masonuku.”

²³⁴ Mpe kuna, ntangu bawu kuwaka yayi, bawu yitukaka na kati ya ntima ya bawu, mpe tubaka, “Bakala na bampangi, yinki beto lenda sala samu na kuzwa mpulusu?”

²³⁵ Pierre tubaka na bawu, “Beno balula ntima!”

²³⁶ Ntangu yayi, nkundi ya munu ya Katolika yina kele ya kuvwanda awa, yina mu zaba yiya to tanu ya beno ya kuvwanda awa. Mu vwandaka solola na nganga-Nzambi ya beno, mu banza nganga-Nzambi *ya beno* ve, kasi mosi ya banganga-Nzambi ya Katolika, yandi tubaka, “Yesu pesaka ngolo na dibuundu na kulemvokila masumu, ‘Konso muntu yina nge me lemvokila masumu, samu na bawu ya ke lemvokila; yina nionso beno ke kanga masumu ya yandi, ya ke kangama samu na bawu.’” Ya kele kieleka. Kasi beto tala wapi mutindu yandi salaka yawu, mutindu bantumwa landaka misiku ya Yandi, ve landila mutindu yina—ti nganga-nzambi ke sala bubu yayi.

²³⁷ Kasi yinki nganga-Nzambi ya ntete, kana beno zola bokila yandi yina, Pierre, yina vwandaka na bafungula ya Kimfumu, wapi mutindu yandi tubaka na kusala yawu? Yandi tubaka,

“Beno balula ntima, mosi na mosi ya beno, mpe beno baka na nkumbu ya Yesu Klisto samu na lemvo ya masumu, mpe beno ke kuzwa dikabu ya Mpeve-Santu. Samu ti nsilulu kele samu na beno, mpe samu na bana ya beno, mpe samu na bayina kele ntama, ya mingi Mfumu Nzambi ya beto ke bokila.” Mpe kana Nzambi ke na kubokila kaka, kimbangi yina kele samu na beno kana beno ke landa mukanda yina mosi. Kana dibuundu yayi ke kwikila Yawu, na bayintu ya beno ya kukulumusa, beno tuba, “Amen.” [Dibuundu me tuba, “Amen.”—Mu.] Na yina, kima ya nkufi ya Yawu kele ya kuswaswana na Ndinga, mpe ve landila Muvungi.

238 Mfumu Yesu, bawu kele na maboko ya Nge ntangu yayi. Mu ke sambila ti konso ntima ya kuzibuka na nkokila yayi yina kele ve na Klisto, Mesiya (mpe Klisto kele Ndinga, Ndinga ya kupakulama yina me monisama), mpe kana ya kele na bantima mosi ya kuzibuka awa na nkokila yayi yina kele ve na Mesiya, Dikabu ya kieleka ya Nowele, Dikabu mosi kaka ya kieleka ya Nowele kele, yina Nzambi pesaka yinza, mpe tubaka Yawu na yinza na nzila ya mivungi, ya Mwana-dimeme ya Yandi, Kukatula-masumu, mpe kana ntima yango kele ya kuzibuka na nkokila yayi, na kisika na yawu, Mfumu, Ndinga ya Mesiya ya bubu yayi. Beto ke pesa bawu na Nge na Nkumbu ya Yesu Klisto, Mwana ya Nge. Amen.

239 Beno zola Yandi? Beno ke kwikila na Yandi? “Beno sosa ntete Kimfumu ya Nzambi, mpe ludedomo ya Yandi, bima nyonso yankaka ke bwelama na beno.”

240 Bampangi, na ntwala beto sukisa, mu zola tuba mutindu yayi. Bambala mingi, ba me bakula munu mbote-mbote. Mu kele na Nsangu ya Nzambi, mpe mu fwana tuba Nsangu yango ata mutindu nyonso. Mu zaba ti ba bakulaka Yawu mbote-mbote. Kana Yawu vwandaka ve, na yina Yawu lendaka vwanda ve Nsangu ya Nzambi; Yawu lendaka vwanda ve. Ya kele na maketiki mingi bubu yayi samu ba bakula Yawu ve na mutindu ya yimbi. Mu ke kwikila ti Nzambi kele na muntu na konso denomination mpe organisation ya yinza, mpe ya kele ve ti mu ke teleminaka bampangi ya munu. Mu kwisaka awa na Tucson, bamvula tatu me luta, mpe mu vwandaka na lukutakanu na beno balongi kuna na Mpangi Gilmore, mpe ba lombaka, munu “nge ke kwisa awa samu na kubanda dibuundu?”

241 Mu tubaka, “Ve, tata. Mu me kwisa awa samu na kusadisa nge.” Kasi ba me bokila munu ntete ve, na bamvula tatu. Kasi kaka mutindu mosi, mu kele awa samu na kusadisa beno. Mu kele awa samu na kuvukisa maboko na beno, mu kele ve na ba-organisation na beno, kasi beno vukana na maboko mpe beno vwanda na Ndinga ya Nzambi, samu na kumeka kulonga Nsangu ya mbote na moyo nionso yina me zimbana mpe muntu nionso yina kele na nsi ya muningu ya bandinga ya beto.

242 Mu ke kukipesa munu mosi na Nzambi, na nkokila yayi, na ntima ya munu ya muvimba, na nionso yina kele na munu. Mu ke na mfunu ya mingi ve; Mu lenda ve kunata ndumbu, mira, mpe wolo, samu mu ke na yawu ve. Kasi nionso yina mu ke na yawu munu mosi ti Nzambi me pesa munu, luzingu yayi, Mu ke na kupesa Yandi yawu dyaka na nkokila yayi, na zulu ya kidikulu ya Ndinga ya Yandi na kati ya ntima ya munu; mpe silaka Yandi, na kutelama na Ndinga yango, kana Yandi ke bika munu kuzinga mvula yankaka, kaka ya kukwikama mutindu mu lendaka telama; kulonga konso kitini ya Yawu, mpe kwikila konso kitini ya Yawu; na yawu, sadisa munu, Nzambi. Nge ke sala mutindu mosi na munu?

243 Yamba beto, Mfumu. Beto ke kuzwa Dikabu ya Nge ya Nowele, Mesiya, Ndinga ya kupakulama yina ke siamisa Mvwandulu ya Nge na beto, Mfumu, ata mutindu credo to denomination. Beto ke mona, beto mosi bubu yayi, yinza me vukana, mpe awa Mesiya ya nene me telama na maboko ya Yandi na zulu ya bantu: Yesu Klisto mutindu mosi mazono, bubu yayi, mpe kukonda nsuka, yina pesaka bansilulu, ti na bilumbu yayi ya nsuka, dibuundu ke vwanda ya organisation mingi tii ya ke kota na Laodicée. Mpe beto ke mona yawu bubu yayi, Mfumu.

244 Yinki beto lenda sala, Nzambi ya luzolo? Yinki mu lenda sala? Sadisa munu mpe mivungi yayi yankaka, Mfumu, na yinza ya muvimba, mivungi ya Ndinga, samu na kuzabisa Yawu, Mfumu, na mvula yayi ke na kwisa. Sadisa beto, Mfumu, beto ke sambila. Pesa beto Zola ya Nge mpe Mpeve ya Nge mpe Nsemo ya Nge. Beto ke kukipesa beto mosi na nkokila yayi na Ndinga ya Nge mpe na lubokilu ya Nge. Na Nkumbu ya Yesu Klisto, beto ke kuzwa Dikabu ya Nge ya Nowele: Ndinga ya Nzambi yina me kuma nzutu na kati ya beto. Amen.

245 Mu ke zolaka mikunga ya dibuundu. Paul tubaka, na Biblia, “Ntangu mu vwandaka yimbila, mu vwandaka yimbila na Mpeve. Mu ke longaka, mu ke longaka na Mpeve. Ntangu mu . . . nionso yina mu ke sala, mu ke sala yawu nionso na Nkumbu ya Yesu Klisto.” Ntangu yayi, mutindu ti Yayi me luta mingi na beno . . . Mpe mu—mu ke sepela na beno. Mu ke kwisaka na Nsangu yayi. Mbala yankaka ya ke monana ti mu ke yinaka kutuba Yawu, kasi mu ke—mu ke na kiyeka ya kutuba Yawu, bampangi. Kana mu sala yawu ve, mu kele muntu ya luvunu. Kana mu sala yawu ve, mu kele muyekudi samu na kosiansi ya munu mosi, mpe lukwikilu ya munu mosi—mosi na Ndinga ya Nzambi. Mu fwana sala yawu, kuvwanda ya kuswaswana ve, kasi kuvwanda ya kukwikama na lubokilu ya munu. Mpe mu zola sadisa beno nionso, mu zola sala nionso mu lenda sala.

246 Ntangu yayi beto yimbila nkunga yayi ya nene ya bantangu nionso, mu zola yawu mingi, *Mu Zola Yandi*. Beno zaba, mu ke kwikila ti kana beto zola Yandi, beto ke sala yina Yandi me lomba beto na kusala. “Wapi mutindu beno ke bokilaka Munu,

‘Mfumu,’ mpe ke sala ve bima yina Mu ke tumaka beno na kusala? Wapi mutindu beno ke bokilaka Munu, ‘Mfumu,’ mpe na manima kusala ve yina mu me tuba na beno na kusala?”

247 Beno zola kuwa mvungu ya mameme yina ke tuba “tula nkumbu na nge na buku, mpe kota kuna; baka kominyo yayi, tuba *yayi*, mpe ya kele nyonso ya kulunga,” ntangu Muvungu ya Nene Yandi tubaka “kana muntu me butuka mbala zole ve yandi lunga mona ve Kimfumu ya Zulu?”

248 Mpe beno tala ba-théologien yina me longokaka, bayina longokaka! Ya Santu? Ya kukondwa mvindu na kuzingaka? Beto kele na kima ve ya kufwanikisa na yawu bubu yayi, mutindu bawu ke zingaka. Mpe yinki Muvungu yayi ya Nene bokilaka bawu? Yandi tubaka, “Nge kele ya tata ya nge dyabulu,” samu ti bawu ve. . . Bawu zabaka Ndinga, kasi Ndinga ya kilumbu yankaka, Ndinga ya kilumbu yina ve.

249 Kana bawu zabaka ntangu ya Noé, ya ke mbote mingi, ya vwandaka ntangu ya Noé; kasi ya vwandaka sala ve na ntangu ya Moise. Mpe ntangu ya Moise lendaka sala ve na ntangu ya Klisto. Beno me mona? Ntangu ya Luther ke sala ve na ntangu ya Wesley. Ntangu ya Wesley ke sala ve na ntangu ya Pentecote. Mpe Pentecote me sala kima mutindu mosi bayankaka me sala. Ntangu yayi, nani me pesa munu lusalusu na bilumbu yina me luta? Mu me yufula beno.

250 Ntangu kitini ya nianga ke basika, yinki ya kele? Yinki . . . ntangu mbuma ya disangu ke basika. Yesu tubaka, “Kana mbuma ya disangu kubwa na zulu ya ntoto.” Yinki salamaka na ntangu mbuma ya disangu . . . to mbuma mosi ke bwa na ntoto? Kima ya ntete yina ke basika kele mwa kitini ya nianga. Ya kele—ya kele ve mutindu mbuma yina kotaka. Beno tala mbote yinza. Yawu ke mutindu mbuma yina kotaka, kasi yawu ke kitini ya Luzingu ya mbuma. Yinki kwisaka . . .

251 Muntu ya ntembe yango sonikaka kaka buku yango ya kuzabana, *Nzambi Ya Swi*, ya tubaka, “Wapi mutindu Nzambi yina lendaka zibula Mubu ya Mbwaki, mpe kutelama na kati ya bamvula difunda mosi ya bansungi ya mudidi mpe kumona ba ke kudia bana ya fioti na bankosi, mpe ba ke kufwa bantu na bakulunsi, mpe kufwa na kati ya balupangu mpe nionso yina, mpe me zibula ata fioti ve yinwa ya Yandi?” Beno me mona, Ndinga kele luzayikisu.

252 Mbuma yina, na ntangu mbuma yina ya kieleka bandaka na mbandukulu, yawu kondwaka Nzambi. Mpe na nsuka kuna me kwiza Blé, kotalana ya kieleka ya Nzambi, yina vwandaka lakisa Ndinga ya Yandi nyonso na mutindu ti Yandi vwandaka Ndinga. Na yina Nzambi pesaka Yandi Kento ya makwela na Pantekote; kasi Kento ya makwela yina kubwaka na ntoto na nzila ya bansungi ya mudidi, kaka mutindu blé ya kieleka salaka, Yawu kubwaka. Mpe samu na yinki ya lendaka simba ve? Samu

yawu vwandaka ya kubumbama na nsi ya ntoto, yawu lendaka kupola na ntuala yawu basisa luzingu.

²⁵³ Kasi kuna me kwiza nganga-Nzambi mosi ya fyoti, na nkumbu ya Martin Luther, mpe yandi ke mwangisa Ndinga mosi ya Kieleka: “Muntu ya mbote ke zinga na lukwikilu,” muntu mosi me kwisa na lweka ya nianga; na manima nianga yankaka landaka yawu, Zwingli, mpe kuna me kwisa Calvin mpe Knox mpe me landila mutindu yina.

²⁵⁴ Kima ya ntete beno zaba, ya me soba kitini ya yawu, ya me kota na felele mosi. Ntangu yayi, yina vwandaka monana fioti mutindu yina, kasi ya vwandaka kaka ve kima ya kieleka yina vwandaka kwenda na ntoto, kuna me kwiza Wesley. Na ngaanda ya dibuundu ya Wesley me kwiza dibuundu ya ba-Méthodiste, na dibuundu ya ba-Methodiste kwisaka ba-Nazaréen, ba-Frere Unis, mpe nionso yina. Yinki yawu salaka? Yawu kulumukaka diaka mpe yawu butaka, yawu monanaka mutindu mbuma ya kieleka ya blé na ntangu yayi, Pentecote.

²⁵⁵ Ntangu yayi, beno tala mbote Yesu, na Matthieu 24:24, “Na kilumbu ya nsuka, bampeve nyonso zole ke vwanda ya kubelama mingi kintwadi tii ya ke vuna bantu ya kieleka ya Kusolama, kana ya lendaka salama.” Ntangu yayi, ntangu mbuma yina ya blé ke basika, konso blé yina me basika zaba ti yina kele mutindu ya kulunga, mbuma ya blé. Kasi beno kele ya kuvwanda na yisi mpe ke baka yawu na diboko ya beno, ke zibula yawu. Ya kele ve na blé na kati ya yawu, ya kele mpusu. Kasi ntama kuna na manima, na nsi ya microscope beno lendaka mona beno mwa kitini ya dititi, kuna ke kwisa mbuma. Mpe kuna yinki kele mpusu yina na kusala? Yawu ke keba mbuma, mwini ya tiya lunga fwa yawu, yawu ke keba mbuma tii kuna bambuma ke yela. Mpe kuna ntangu mbuma me kula, mpusu me basika na yawu. Kasi, beno me bakula, mbuma yina basikaka, fwana vwanda kaka mutindu mosi ya mbuma yina kwendaka na ntoto.

²⁵⁶ Na manima ya reveil ya Luther, me kwisa organisation. Na manima ya reveil ya Wesley, me kwisa organisation. Na manima Alexander Smith, Jean . . . Alexandre le Campbell, John Smith, bawu nyonso yankaka, me kwisa organisation. Na manima ya Pentecote, kaka mutindu kima ya kieleka, kasi yawu me kwisa organisation. Yinki yawu me sala? Yawu me kwenda.

²⁵⁷ Beto me zwaka bamvula kumi na tanu ya reveil, yawu me zabanaka ata fioti ve na disolo ya mutindu nionso. Mpe beno tala mbote, na reveil ya bamvula kumi na tanu yayi, Yawu ke kwenda bisika nionso na yinza, mpe ata organisation mosi ve me mwangana na Yawu. Wapi kisika Yawu vwandaka? (Yawu bandaka mvula ya nsuka, yawu fwaka na ntangu ya . . . na ntangu yina, yawu fwaka.) Ya ke na organisation mosi ve ke landa Yayi. Samu na yinki? Ya ke mbuma Yawu mosi, kuna lenda vwanda diaka ve. Mpe mpusu ntangu yayi ke na kukwendaka, na

kusala kintwadi, ti muntu ve zola beno. Samu na yinki ya kele? Ya fwana vwanda Yawu.

258 Samu na yinki dibuundu yina vwandaka kuna? Samu na kusimbisa Yawu. Wapi sika... Nani ke zola kundima? Wapi Baptiste, to Presbyterien, to Luthérien ke simbidila campagne ya Kinzambi ya kubeluka ya nzutu? Ntangu yayi ntangu Kieleka ke kwisa, yinki ke salama? Mpusu ve; kasi Luzingu ke basika kaka mbala mosi na mpusu, mbala mosi na kati ya mbuma, Luzingu ya kieleka ya kieleka. Organisation ke telama kuna, ke kufwa, kaka mutindu ya me sala na bansungi nyonso, ya ke sala mutindu mosi. Beno me basika na yawu, bamvula makumi tanu me luta, mpe me vutuka mbala mosi dyaka na kati ya yawu! Kasi Luzingu ya kieleka ke landa mbuma, beto me kuma na ntangu ya nsuka, bampangi.

259 Samu na yinki yawu me kwenda? Na yawu ti ya ke nata mbuma na mvwandulu ya Mwana, samu na kuyelisa mbuma na kuyela ya kulunga samu na Mulongi. Samu na yinki ya me kwenda ntama? Na yina, ya ke nata bimbevo ya ntima, masa ya masa, ti ba lendaka ve kuvwanda na ntwala ya m-w-i-n-i [s-u-n—Mu.], kasi M-w-a-n-a [S-o-n], samu na kuyela na Nsangu ya mbote ya muvimba, samu na kutalana nionso yina Yesu Klisto silaka na Biblia. Ya kele na Nzutu bubu yayi na kati ya bantu. Mpe ya ke vwanda diaka na ba-organisation ve, ya ke kwenda kuna na Laodicée. Na yinki organisation me kwenda na ntwala? Ba-million ya ba-dollars, mpe ba-million ya mioyo.

260 Mpe yinki vwandaka Muvungi me katuka? Samu na kuvulusa bampangi ya Yandi na kimpika. Mu—mu zaba ve; Nzambi, vwanda na beto, sadisa beto. Longuka Ndinga! Beno longuka Masonuku! Na Yawu beto ke banza ti beto kele na Luzingu ya Kukonda nsuka, mpe Yawu kele Yawu yina ke pesa kimbangi ya Kieleka. Beno me mona, Nzambi tulaka Bandinga ya Yandi nionso na bansungi nionso. Nsungi yayi ntangu nionso... .

261 Yinki Yesu tubaka na ntangu Yandi kwisaka? Yandi tubaka na bantu yina, “Beni bantu ya luvunu! Beni ke bokaka bibaka, mpe beno ke tungaka bantoni ya bapofete, mpe ya kele batata ya beno tulaka bawu na kati kuna. Mpe beno kele bana ya batata ya beno. Mpe bisalu yina bawu salaka, beno ke sala mpe.” Ya kele kaka mutindu mosi, bampangi ya munu.

262 Kasi ntangu Yesu ke kwisa kilumbu mosi, Muvungi ya nene ya mameme kubanda Pentecote na nzila ya Luther na kati ya bansungi nionso, yina me ndima Nsemo mutindu Yawu kwisaka na nzila ya minati (ve ndimaka munati, ndimaka Nsemo; beno me mona, basikaka), Yandi ke kwiza na kuvuukisa. Mu kele na kyese ti mu zaba ti Yandi ke na kwiza dyaka. Oh, beno ke tanga na nkonga ya Yandi? Beni ke tangama? Ya kele kaka na mutindu mosi ya kusala yawu, ve na kukumaka muntu ya dibuundu, kasi

na kuvwandaka ya kubutama na kati ya Yandi. “Mpe bayina nionso Tata pesaka Munu, ke kwisa na Munu, mpe muntu mosi ve lenda kwisa kukondwa Tata ya Munu kubokila yandi.” Beno me mona, yawu yina kaka, beno ndima Yawu. Yandi. . . Yina ke Dikabu mosi kaka ya Nowele yina mu zaba, kele dikabu ya Nzambi yina Yandi pesaka na yinza, Mwana ya Yandi mosi kaka me basika. Mpe Yandi kele mutindu mosi, mazono, bubu yayi, mpe kukonda nsuka, Ndinga. Beno me mona? Beno kwikila Yandi na kilumba yayi, muvimba ya Biblia.

²⁶³ Ntangu manswewi sambwadi yango. . . Kuna na nzila ya Bansungi Sambwadi ya Dibuundu, ya vwandaka na manswewi sambwadi ya kubumbama. Mu ke sonika buku ya Yawu. Mpe théologien mosi ya nene mingi tubaka na munu ntama mingi ve, yandi tubaka, “Mpangi Branham. . .” Beno me mona mutindu Satana ke meka na kukatula nge nzila? Yandi tubaka, “Mpangi Branham, nge zaba yinki? Mu ke kwikila ti Mfumu ke talisa na beno yina beto ke sala na ntwala. Ya ke vwanda ti. . . ya ke vwanda diambu mosi ya nene yina ba bumbaka na nsi ya Bidimbu Sambwadi yayi.”

²⁶⁴ Mu tubaka, “Ve, ya ke mutindu yina ve, mpangi-bakala.”

²⁶⁵ Yandi tubaka, “Ya ke vwanda kima yina ba sonikaka ve na Ndinga.”

²⁶⁶ Mu tubaka, “Ve! Ve! Nge me zimbana, ‘Muntu nionso yina ke yika ndinga mosi, to ke katula Ndinga mosi.’” Beno me mona, Ya kele yimeni kuna, kasi ba-reformateur me lembanaka na kumona Yawu, bawu vwandaka ve moyo ntama mingi na kumona Yawu.

²⁶⁷ Mpe bansungi me suka ntangu yayi, beto me kuma awa na Laodicée. Mpe beno bambuka moyo, nsungi ya Laodicée, Yandi vwandaka na nganda ya dibuundu, ke kokotila, ke na kumeka na kuvutuka: Eve tulaka yandi Adam na nganda. Nzambi, sadisa beto. Beto kwenda ntama ya camp samu na kumona Yandi. Beto bika mpasi kukondwa bankotolo na Yandi. Beto kwenda na Yandi na lufwa ya Yandi, na luzikulu ya Yandi, mpe na mvumbukulu ya Yandi; samu ti Yandi kele mutindu mosi mazono, bubu yayi, mpe kukonda nsuka.

²⁶⁸ Beto kuyimba nkunga mosi ntete beto kwenda. Nge zola? *Mu Zola Yandi*. Nge lenda pesa beto noti, mpangi-kento? Bantu yikwa zaba nkunga yayi ya ntama? Mu. . . Kana beno me vwandaka ntete ve na balukutakanu, mu ke zolaka yawu.

²⁶⁹ Ntangu yayi bika beto kanga meso ya beto, kubanza na Yehowa. Muntu mosi ve vwandaka ya kulunga, muntu mosi ve lendaka sala yawu kasi Yandi. Mpe Yandi kulumukaka, mpe kumaka mwa bébé. Yandi me kwisa, mwa fioti. Yandi me kuma charpentier, bakala mosi ke sala kisalu. Yandi me kuma Mwana-dimeme, Yandi me kuma munkayulu. Yandi vumbuka na lunungu, Yehowa. Mpe mutindu Moise basisaka diboko ya yandi

na ntulu ya yandi, Nzambi basisaka diboko ya Yandi na ntulu ya Yandi (kinsweki ya Yandi) Mwana ya Yandi yina ba bulaka na kimbevo ya masumu, yina ke ya kitoko ve; mpe mu tulaka Yawu diaka na ntulu, mpe bendaka Yawu mpe mu kutanaka na Yawu na beno mpe munu: “Yesu Klisto mutindu mosi mazono, bubu yayi, mpe kukonda nsuka.”

270 Beno tala Yandi ntangu yayi.

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

271 Bantu yikwa zaba ti ya fwana vwanda muvungi, beno tuba “Amen.” [Dibuundu me tuba, “Amen.”—Mu.] Ya fwana vwanda! Samu na yinki muvungi? Ya fwana vwanda. Ntangu yayi na ntangu beto ke yimbila diaka nzila yina, na lweka ya mesa. Beno tala Méthodiste, Baptiste, Luther, Presbytérien, Katolika, mpe nyonso, ya kuvwanda awa na nkokila yayi. Beno pesana mbote, beno tuba, “Nkundi ya munu kizieti, mu ke na kiese mingi na kuvwanda awa na nge, na nkokila yayi.” Beno tuba kima mosi na bawu. Beno tuba, “Nzambi sakumuna nge,” na yina beto ke pesana mbote mosi na yankaka ntangu yayi. Na yina beto ke yimba yawu dyaka ntangu yayi.

Mu . . . [Kisika ya mpamba na bande—Mu.]
. . . mpulusu ya munu
Na yinti ya Calvaire.

272 Ntangu yayi beto kanga meso ya beto mpe beto telemisa maboko ya beto, mpe beto yimbila Yandi.

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

273 Mpe ntangu yayi, kukondwa mutindu ya Nzambi. Na yina, beto kulumusa bayintu ya beto mpe beto yimba yawu ntangu yayi, mutindu bana ya fyoti, beno kele bana ya Nzambi. Beno tala ve na yina yinza lenda banza, beno ke na kukembila ntangu yayi, kusambila Klisto. Beno kulumusa bayintu ya beno mpe beno yimba yawu na kuniungutaka. [Mpangi Branham ke na kuniunguta *Mu Zola Yandi*—Mu.]

274 Beno ke kuwa ve ti beno me kuma ya muvimba lebe-lebe? Kaka mutindu ya Kima yina ke bendaka beno ntembe mpe yinza ntama na beno? Beno ke kuwa mutindu yina? Beno telemisa maboko ya beno, “Mu ke na kutala na nzutu ya muvimba ya kuvedila. Mu ke na kutala na mutindu yankaka. Mu ke na kutala mutindu ti mu vwanda kudya na maboko ya Yandi. Mu me . . .” Mutindu mpangi-bakala awa pesaka kimbangi, “Madya, Madia ya Muvungi, Madya.” Ya kele Ndinga.

275 Mameme ya Nzambi ke disaka na Madia ya Yandi, “Muntu ke zinga kaka ve na dimpa, kasi na nzila ya konso Ndinga yina ke basika na yinwa ya Nzambi.” Mpe yayi kele Yawu, Biblia. Beto ke kudiaka na konso Ndinga, kaka mwa Bandinga, kasi konso Ndinga yina ke kwizaka. Oh, ve ya ke sala beno kuzola Yandi? Kubanza ti ntangu yayi beto kele na Luzingu ya Kukonda nsuka! Ve beto ke vwanda, *ntangu yayi* beto kele bana ya babakala ya Nzambi. Beto ke vwanda ve, ntangu yayi! Mpe ya kele ya kuvwanda kintwadi na bisika ya mazulu *na kati* ya Klisto Yesu. Mpe television ya nene, yina ke tuba ti ya kele na muningu ya kitoko yina ke salaka bantu (muntu yina ke salaka nzietolo na ntoto ya muvimba) yina me zabana na—na écran ya télévision. Ndinga ya nene ya Nzambi, mpe Mpeve ya Nzambi ke baka Ndinga ya Nzambi, ke lakisa Yesu Klisto na bisika ya mazulu na mameme ya Yandi, ti Yandi kele mutindu mosi mazono, bubu yayi, mpe kukonda nsuka. Yandi kele ve mbote? Mbote! Nzambi sakumuna beno.

276 Ntangu yayi beto telama kaka mwa ntangu fyoti. Beno kele muntu samu na diambu ya kuyidika yandi? Ntangu yayi, beno bambuka moyo, na ntangu ya Nowele, beno sambila Mfumu Yesu. Beno sambila Yandi na Ngolo ya mvumbukulu ya Yandi. Mpe kana mu lenda kuzwa lemvo ya beno (beno, pasteur ya beno, dibuundu ya beno, to nyonso yina), mpimpa me kumaka mudidi mingi ata fioti ve, mvula me kunokaka ngolo mingi ata fioti ve.

277 Nkokila yankaka yina (ya kele na mama mosi yina kele ya kutelama awa) Mu vwandaka na bisalu mingi, mu nataka bambevo mpe nionso yina tii kuna. . . Kuvwandaka na bamvula makumi nana na kima mosi yina lutaka kento yina zimbisaka mabanza ya yandi, mpe yandi vwandaka. . . yandi banzaka ti yandi vwandaka kuzwa bébé to kima mosi, yandi vwandaka basika na mabanza ya yandi. Mpe Billy, na bureau, bokilaka munu, yandi tubaka, “Papa, nge lenda sala yawu?”

278 Mu tubaka, “Mu lenda ve kusala yawu malu-malu yayi. Ya kele na bantu. . . Mu lenda ve kusala yawu.”

279 Yandi tubaka, “Papa, nge lenda sambila? Mu ke tuba na bawu ti nge ke sambila.”

280 Mu tubaka, “Yinga.” Mpe na ntangu yina yandi kwisaka na yandi mosi. Yandi lalaka, yandi vumbukaka na lufwa na mutindu ya yandi ya mbote; yandi kudiaka madia ya nene, nsusu ya madia ya nkokila, na sense ya mbote. Muntu vwandaka ya kutelama awa vwandaka pesa kimbangi ya yawu na mwa ntangu fyoti me luta.

281 Mpangi Mack, mu monaka yandi awa ntama mingi ve, kisika mosi na dibuundu. Yandi kele awa, mosi ya ba-pasteur, pasteur mosi ya awa. Mpangi-bakala mosi ya luzolo mingi, mpe mu ke zolaka ntangu nionso Mpangi Mack kubanda mu bandaka ntete na ministere. Na manima mu kutanaka na yandi. . .

282 Mpe mu vwandaka kuna na Colombie Britanique; mpe samu na kutalisa na beno mutindu ti Nzambi ke sala nionso mbote. Mu vwandaka yimeni ya kumata na zulu ya mpunda, mpe mu vwandaka vutuka na ntoto ya kuyuma kisika mu vwandaka twadisa nkonga ya muvimba ya ba Indien na Nzambi; mpe bawu nionso vwandaka ya kubalula ntima, mpe vwandaka me kuyamba Yesu.

283 Mpe na nzila ya profesu yina me tuba na mwana-bakala ya Indien yina me zimbisa mwana ya mpunda ya yandi, bamvula zole me luta, tubaka na yandi kisika yandi lendaka mona yawu, wapi mutindu ya ke vwanda ntama, mpe kisika mwa mpunda ya fioti ke vwanda ya kutelama. Mama ya yandi vwandaka kufwa na mpasi ya ntima. Yandi belukaka mpe yandi vulukaka. Mpe mwana-bakala yayi, ke na kukwisa kaka mpe ke mona yawu, mpe ke zaba ti yandi. . . mpunda ya yandi vwandaka kieleka na mutindu ya kutuba, mpe nionso yina.

284 Ve Ndinga mosi kele na Mfumu me zonga. . . Mu ke lombamba mosi ya beno, “Yandi. . . beno me kuwaka ntete Yandi kutuba kima mosi, ti Yandi tubaka na munu na kutuba na beno, kasi yina me salamaka kaka kieleka?” Kana ya kele kieleka, beno tuba “Amen.” [Dibuundu me tuba, “Amen.”—Mu.] Beno me mona? Beno me mona? Ya kieleka, ata mbala mosi ve ti Yawu me kondwaka kilumbu mosi.

285 Mpe Mpangi Mack vwandaka kuna na kisika ya lufwa, mpe yandi kumaka ti kento ya yandi bokilaka Billy. . . kento ya mwana ya munu, mpe tubaka. . . yufula wapi sika mu vwandaka; mwa mama yina ya lutondo mpe. . . kento ya yandi. Mpe yandi. . . Mpe bokilo ya munu ya kento tubaka, “Yandi kele na nzila na norde ya Colombie Britanique na kukwenda kuzomba.”

286 Mpe na suka yina, na mutindu nionso, mu—mu—mu lendaka kaka ve kunata mpunda yina. Mpe Billy tubaka, “Mu ke kwikila ti mu ke vutuka diaka na yinzo.” Mpe yandi kwendaka na poto ya kubokila. Mpe awa ba me kwisa mbangu, ntangu mwa Indien yina me telama kuna, mwa. . . yina vwandaka na mwana ya mpunda, mpe tubaka, “Mpangi Mack kele ya kulala pene-pene ya kufwa, mpe yandi ke na kubokila nge.”

287 Mpe mu kwendaka, mu kwendaka kuna na kati ya mfinda mpe mu fukamaka. Mu tubaka, “Nzambi ya Luzolo, kuna na nsi, na ba-kilometre mafunda tatu na yinsi, na kizunga ya Arizona, na Tucson, kele mpangi ya munu ya bakala, mpe yandi kele ya kuvwanda na kisika ya lufwa. Nge zola kusadisa yandi?”

288 Kima mosi tubaka na munu, “Nionso ke mbote.”

289 Mpe ntangu mu kumaka na Mpangi Mack kilumbu yina, samu na kusolula na yandi, mpe mu yufulaka yandi, “Wapi ngunga yawu salamaka?” ya vwandaka kieleka ngunga yina beto vwandaka sambila.

²⁹⁰ Oh, Yandi . . . Yandi kele mbote ve! Yandi kele mutindu mosi mazono, bubu yayi, mpe kukonda nsuka. Mu ke na kiese mingi na kuzaba ti mu ke zinga na Ntwala ya Ntinu.

²⁹¹ Beto kulumusa bayintu ya beto ntangu yayi, mpe mpangi-bakala mosi ya ntalu kele awa, mpangi-bakala ya missionary, nkundi ya munu, mosi ya ba-Assemblée ya Nzambi, mpangi-bakala ya ntalu ya fioti awa. Mu ke bokila yandi, “Creechy.” Yandi zonzaka mwa bima ya mbote. Mpangi Creech, mu ke na kubokila nge yawu. Mu zaba ve yinki kutuba, beno kele mpangi ya munu ya bakala mpe kisadi na balukwamusu ya Yesu Klisto na kilumbu ya nsuka yayi. Bika ti Nzambi sakumuna beno. Mpe mu banza ti Mpangi Tony me tuba ti nge ke kanga na ntangu yayi, na yina beto ke kulumusa bayintu ya beto. Mbote mingi, kwisa.



SAMU NA YINKI YA ZOLAKA VWANDA MUVUNGI KNG64-1221
(Why It Had To Be Shepherd)

Nsangu yayi ya Mpangi William Marrion Branham, kulongamaka na Kingelesi, na Kilumbu ya ntete na nkokila, na kilumbu ya 21 ya Ngonda ya kumi na zole, na mvula 1964, samu na nkinzi ya Kimpangi ya Yinza ya muvimba ya Bantu ya Mumbongo ya Nsangu ya mbote ya Muvimba na Ramada Inn na Tucson, Arizona, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org